

Ukraina Milliyy sanat müzeyi, on doqquzuncı asırnıñ soñunda Ukraina ziyalılarınıñ ğayreti ile Kiyiv şeer antik ve sanat müzeyi olaraq quruldı.

Statusına baqmadan er kesniñ ziyaret ete bilecegi ilk müzey oldı.

Ziyaretçilerni qarşılap alğan ilk sanat eseri, leyhası Moskvalı mimar Pötr Boytsov tarafından azırlanıp, neoklassik üslubinde qurulğan müzeyniñ binasıdır.

Leyha belli Kiyivli mimar Vladislav Gorodetskiy tarafından yekünlendi ve idare etildi.

Müteşem arslanlar ile beraber binanıñ ögünü usta Elio Salâ yaptı.

Qayd etmek kerek ki, müzey arslanları eykelciniñ icadiy deñevidir.

Olarınıñ yapuv usulı hususiydir: evel adetince eykelciler granitten ya da madenden yapsalar, müellif sırf qurucılıq malzemesi sayılğan tsementniñ estetik potentsialını köstere.

Tırnaqlardan gür yalınğa qadar er bir detal ustanıñ özü tarafından yekünlengen.

Müzeyniñ ekspozitsiyasında sekiz yüzge yaqın eksponat bar, fondlarda ise qırq biñden çoq sanat eseri ve arhiv materialı saqlı tura.

Bu, Kiyiv Rus vaqtından bugünge qadar olğan Ukraina sanatınıñ eñ temsiliy kolleksiyası.

Yelizaveta Skiçko-Yuruşevanıñ hayriye destegi ve leyhanıñ ortağ prodüserleri – televizion alıp barıcı Olekasandr Pedan, 23-59.com.ua internent neşriniñ reberi Viktoriya Voloşına ve “Meraqlı Kiyiv” leyhasnıñ tesisçisi Arseniy Finbergniñ ğayreti sayesinde Milliyy sanat müzeyinde “Resimler laf etip başlağanda” leyhası ömürge keçirildi.

Bu eser alışıлмаğan bir yapma tehnikasinen birden diqqat çeke.

Adet üzre azizlerni tüzlemde tasvir eteler, mında ise üçölçülü, çoq renkli bir relyefni köremiz...

Bütün dünyada bu ikonaların bir kaç örneği saqlanıp qalğandır.

O qadar eski ve böyle formatta.

Onıñ vaziyeti zor ve facialı bir taqdiri olğanını köstere.

Tetqiqatçıların farz etkenlerine köre "Aziz Georgiy aqqında" ikonası XII asırda Bizans imperiya topraqlarında yaratılmışdır.

Bir zaman devamında Qırımda, meşur Hersones yanında, Georgiy manastırında bulundu.

18 asırnıñ soñunda, Rusiye imperatriçesi II Yekaterinanıñ fermanınen yunan cemiyetini Qırımdan yañı qurulğan Mariupol şeerine sürgün etkende, yunanlılar pek ürmət etken ve mucizeviy olaraq sayğan bu ikonanı yanlarına aldılar.

Kompozitsiyanıñ merkezinde - aziz Georgiy cenkçi obrazındadır: silâ ve zırhlı taqım içinde, mızraq ve qalqan ile.

Georgiy Roma imperiyasında III asırnıñ soñunda - IV asırnıñ başında yaşağanı ve ilk hristianlardan biri olğanı bilinmektedir.

Orduda hizmet etti, qabiliyetleri ve cesürlük sayesinde daa genç yaşlarında Diokletian imperatorı devrinde serasker unvanını aldı.

Tamam bu zamanlarda hristianların taqip etilmeleri arttı ve imperatorğa Georgiyniñ hristianlıqnıñ destekçisi olğanını bildirgenlerinde, imperator buna inanmadı.

Ve Georgiyni özüne davet etti.

Tamam sorğu levhası üst sol tamğada, yani ufaq dörtköşe resimde tasvir etilgendir.

Aziz Georgiy Diokletian imperatorı ve onıñ yardımcı ükümdarı Maksimian ögünde tura.

Georgiy sorğuda imanını tasdıqladı ve çoq sayılı işkenceler, çekıştirmelerge oğradı.

Bular ikonanın diger qısımlarında kösterilgendir.

Sağda, üç merkeziy tamğada, Georgiyniñ daa ayatta eken, apishanede bulunğanı vaqıt, kerçekleştirgen mucizeleriniñ levhaları tasvir etilgen.

Bu yüzbaşı Leon oğlunıñ tirilmesi, köylü Glikeriy ögüziniñ tedavileşmesi ve putların yıqılmasıdır.

Bu süjetler aziz tarih qaramannıñ ayat devamında yapqan aziz areketler, mucizeleriniñ delilidir.

Bu deliller Georgiyniñ azizler sırasına kirsetilmesiniñ temeli oldı.

Sağda aşadaki soñ resim, imannıñ fevqulâde sertligini köstergen ve itiqatlarından vazgeçmegen Aziz Georgiynıñ telefonı tasvir ete.

"Aziz Georgiy aqqında" ikonası müzeyimizge şaşılaçaq bir şekilde keldi.

Uzun bir vaqıt devamında bu ikona aqqında bilinmey edi.

Yalınız vesiqalı deliller ve qara-beyaz fotoları bar edi.

Tek 1965 senesi eki kıyivli sanatşınas Lüdmila Milâyeva ve Grigoriy Logvin onı Mariupol müzeyiniñ işte qullanılğan kölük-kedik saqlağanları bir odada tesadüfen tapılar.

Tetqiqatçılar yerde eski tahtalardan yapılğan bir nesne kördiler.

Kötergenlerinde eski bir yadikârlıqı tapqanlarını añladılar.

Restavratsiyadan soñra ikona müzeyimizniñ kolleksiyasında müim bir yerni aldı.

Georgiynıñ yanında Galıçına-Volın kinazlığında - Şarqiy Avropadaki bir devlette yaratılğan eki ikona bar.

XIII asırda Kıyiv Rus devletiniñ inqirazından soñ Ukraina topraqlarınıñ medeniy ve diniy merkezi mında edi.

13 asırnıñ Galıçına ressamlığınıñ nadir abidelerinden biri olğan "Aziz Meryem ananın pokrovı" ikonası özgün ve unikal bir ikonografiyağa maliktir.

Özgünligi, şekil ve sızıqlarınıñ ayrıca kösterilgen sadeliginde dir.

Buña köre de, tetqiqatçılarınıñ fikrince, ikona ihtisasiy bir ikonanın biraz saf kopiyası ola bile.

Bu ikona nevbetteki yüksek sanat ananeleriniñ nümunesi olğan "Volınlı Meryem ana" ikonası ile teñeştirilse bir aveskârniñ eli birden körünip tura.

O, Volın topraqlarında Galıçına-Volın kinazlığı mevcutlığınıñ soñki onyıllığında, tahminen 14-nci asırnıñ ortalarında yaratılğan.

İkona Meryem ana Odıgitriya Perıvleptanıñ Bizans ikonografik tipini temsil ete.

"Perıvlepta" "yaman güzel" demektir.

"Odıgitriya" yunan tilinden "yol köstericisi" kibi tercime etile.

İnsan ruhunuñ qurtuluş yolu. Meryem ananın bir qaç tasvirlev çeşiti bar ve "Odıgitriya" eñ çoq qullanılğanlardan biridir.

Meryem ana bir elinen hayır parmağına el qoyğan qundaq balasını tuta, diger qolunen ise Mesihniñ dinini qabul etecekleriniñ episi içün qurtuluş yolu kibi kiçik İsağa işaret ete.

Mesihniñ yüzüne diqqat etiñiz.

Bu, yetişken bir kişiniñ yüzü olğan ufaq bala.

Bu tasvir printsiipi timsaliydir ve İsanıñ fedakârlıq seçiminiñ şuurlı olması demektir.

Umumen, ikona sanatıñ timsaliy maiyeti er şeyde, renklerde de özünü köstere.

Renklerniñ azırlanğan iyerarhiyasına köre, azizlerniñ başları etrafındaki alqaları işaretlengen altın ya da sarı tüs ikona sanatında yüksek sayıla edi.

İlâhiy yarıqnı timsal etken altın ya da sarı tüslerdir.

Ananeviy olaraq, ikonaları ağaç tahtalarğa temper boyalarnen yaza ediler, olarnıñ esasında yımırta sarısı ya da aqı edi, içine ise ösümlük ya da mineral boyalar qoşula edi.

Böyle boya levkas tabaqasına qoyula edi – kolagen tutqalı ile bor qarışması.

Temper boyama tehnikasınıñ qullanması sayesinde qadimiy diniy eserler vaqıtıñ imtianından keçip oldı.

"Qazaq portretinen haçqa kerme" ikonası 1648 senesinden 1781 senesine qadar bar olğan qazaq devletini, Getmanlıqnı temsil ete.

Şanlı meşur getman İvan Mazepanıñ zamanında, 1700 senesinden evel yazılğandır.

Yerdeki şapkağa diqqat etiñiz. Er alda, bu ikona qazaqqa, büyük ihtimal luben albay Leontiy Sviçkağa, bir epitafiya olaraq hizmet etkenini añlata.

Bu, ölgen hayırseverlerni sıq-sıq tiz üstü tasvir etilgen nürnberg ve vrotslav epitafiya kompozitsiyalarınıñ bir aksidir.

"Qazaq portretinen haçqa kerme" ikonası devirniñ emiyetli bir eseridir.

Böyle bir eserniñ peyda olması kerçegi, getman Mazepanıñ etraftaki adamlarınıñ özlerini avropa medeniyeti saasınıñ bir parçası olaraq şuuruna barğanını köstere.

Qazaq çizgileri, şübesiz, portretli.

Tarihiy şahısniñ ikonada peyda olması, müellifni portret beñzerligi ile körünişni yañıdan yaratmasını isteklendirmekte.

Müellif, belli bir kişinin qərarlı, üküm etken, sert təbiətli olğanını pek yaxşı bir şəkildə ifadə ete.

Qazaqın turuşına diqqət etiñiz.

Daa 16 asırdan başlap dünya insanının haçqa kerilmesi, ukrain ikonalarında alışılgan bir şey oldı.

Amma iç bir vaxt adiy bir ölümli bu ikonada olğanı kibi azizlənən tən kəlmədi.

Tarihiy şahsın ve azizlərin fərqli dünyalarğa ait olğanları, təsvir etilgen fon ilə ayrıca kösterilə.

Eger Meryem ana və ilâhiyatçı, vaxtsız bir ölçəmini təmsal etken altın bir fonda bulunsa, qazaq isə dünya ələmini təsvirlegən kərəkçi manzara fonda bulunmaqdadır.

Bu eserdə, ikona rəsim yəmədə ukrain barokko tərzinin xüsusiyyətləri maksimal olaraq kontsentratsiyalanğandır: oyma altın tülü fon, məkânın kərəkçi bir təsviri, Qurtarıcının bədən anatomiyası, bədən şəklini təkrarlagan personajların urbaları.

Məraqlı olğan şü ki, ikonada dinge ait olmağın türler elementlərini də tapmağa mümkün: o zaman ukrain sənətində pəydə olğan – portret və peyzaj.

Böyləce ikonanın ikinci planındakı mimariy yəpıda, Qudusnı şərtlə olaraq bəlgilegen, qazaqnen bağı belli bir kilsenin, belki də ikonanın kəlip çıqqan kilsenin, xüsusiyyətlərini təsəvvür etmək mümkün.

Çünki, bu devirdə ikona rəsim yəmədə yalnız kərək insanlar degil, aynı zamanda kərək yapıları da təsvir etmə meyli təzleşti.

İkona 1900 sənəsi, müzeynin qurulmasının baş təşkilçisi olğan kiyivli hayırsever Bogdan Hanenkön ediyəsi olaraq kolleksiyaya kirdi.

Lubensk alayına kirgen Pırâtına yaqınlarındakı Oleksiyivka köyünün kilsəsindən çıxarıldı.

Tamam bu səbəptən təsvir etilgen qazaqnı luben albayı Leontiy Sviçka olğanını tüşünələr.

Lâkin, portretteki şahsın (Oleksiyivka ya da Pırâtınənən bağı şahs) adını bəlgilə biləcək faktlar daa meydanğa çıqqmadı.

Ayrıca, ikonanın müəllifi aqqında da qıdırmalar yapıla.

İhtimal ki, bu ikona Mğar manastırında 17 asırnıñ soñlarında ressamlıq eserlerniñ müellifi, lubenli Yosip İvanoviç tarafından yazılğandır.

Pırâtınalı İvan Maksimoviç (1720 seneleri lavr boyacı ustahanesiniñ başlığı) da ola bilir.

Ne yazıq ki, Mazepa devriniñ Sol yalı boyacılıq merkezleri aqqında malümat yoq, amma bulardan birisi Getmanlıq paytahtı Baturin ola bilecegi versiyası bar.

Ögüñizde müzeyniñ kolleksiyasındaki pek qıymetli incileri.

Ulu şeitler Anastasiya ve Ulânanı, Varvara ve Katerınanı tasvir etken eki çift ikona.

Bu, belli olmağan bir kilseniñ ikonostasınıñ bir parçasıdır.

İkona ressamınıñ yüksek ihtisaslıq seviyesine ve ikonalarınıñ büyük sanat qıymetine baqmadan mütehassıslar qaydan kelgenlerini pek meraq eteler.

Bu ikonalarınıñ Sovet ükümeti dinge qarşı küreşte kilseniñ qıymetli şeylerini elge keçirip yoq etken zaman Konotop şeeriniñ yerli tarih müzeyine kelgeni bellidir.

Buña köre de olarnıñ peyda oluv yeri Konotop şeerı ya da qomşu rayonlar ile bağılı olması mümkündür.

İkonalar müzeyimizge 1967-68 seneleri keldi.

Ulu şeitler Anastasiya ve Ulânanıñ resmi Ukraina içün pek nadirdir.

Eki getman qadın aqqında fikirler peyda olmasınıñ sebebidir – Anastasiya Skoropadska ve Ulâna Apostol.

Getman İvan Skoropadskıynıñ apayı Anastasiya Skoropadska 1717 senesi Gluhovda Üç Anastasiya kilsesini qurdı.

1709 senesi Gluhov Getmanlıqnıñ paytahtı oldı.

Obrazlarınıñ dünyaviyligi diqqat çeke, çünki adetince azizler çöl manzarası üzerinde azap tolu çıraylarinen riyazet urbalarda tasvir etile ediler.

Yani, bütün tış vastalar ulu şeitlerniñ dünyaviy yaşayışnıñ güzelliklerinden ve quvançlarından uzaqlaştırılması qayd etile edi.

Amma bu obrazlarda pek güzel urbalarda, zarif saçlı ve bezekli, attı yanaqlarda allıq ile şeitlerni köremiz.

Olarnıñ deñişüvi, Ukraina ikona sanatında temelli deñişmelerge sebep olğan ve “Ukraina barokkosı” kibi tanılğan

Avropa barokkosının milliy versiyasının yaratılmasına sebep olğan Barokko devrinin yañı estetik ideallarına esaslana.

Bu zamannın ikonaları bayram hasiyetini aldı, içerisinde maddiy, dünyaviy güzellik maneviy güzellikniñ ifadecisi oldı.

Ögümüzde ulu şeytlernin obrazları olğanının delili olarnın qollarında tutqan eşyalardır.

Çünki ikonadaki er angi bir element tesadüfiy degil.

Şeytlikleriniñ timsali qollarında tutqan nehl pitaqları ve haçlardır.

Kıyiv Rusten berli Ukraina topraqlarında kultu tasdıqlanğan ulu şeyt Varvaranın bir hususiyeti, elinde tutqan sofraya da çay kasesidir.

O, azizlernin alâqası olmadan ölgen ruhlarğa şefaatin bir timsalidir.

Azizlernin qolundaki qılıçlar olar Mesih dininin oğrunda küreşkeniniñ timalidir.

Amma küçleri fizikiy silâda degil, dua ve imandadır.

Diqqat etinin, aziz Varvara qılıç üstünde, aziz Anastasiya ise tegernin üstündedir.

Tam bu aletlerden ulu şeytlet öldürilgen edi.

Eñ büyügi Peçersk Aziz papazların Baş kilsesi olğan altı ikona, 1718 senesi yangında zarar körgen Kıyiv-Peçersk lavra Uspensk baş kilsesinin yañarma vaqtında yazıldı.

Uspensk baş kilsesi 11-inci asırnıñ soñunda quruldı. Asırlıq tarih boyunca bir çoq kere: zelzele, moğollar daa soñra tatarlar, 1718 senesi yangın neticesinde yıqılğan özgün bir mimariy yadikârlıqtır. Bu ikonalar yañı ikonostas için tamam yangından soñ baş kilsenin yañarması vaqtında yaratıldı.

Baş kilsenin soñ yıqılması 1941 senesi, Ekinci cian cenki vaqtında oldı. Bir çoq patlamadan soñ, ibadethanenin yerinde tek virane bar edi. Endi iç ğayrıdan tiklenmez kibi körüne edi. Amma 2000 senesi ibadethane, 18-inci asırnıñ başında getman Mazepa tarafından yapılğan restavratsiyadan soñ aldaki kibi baroko şekillerinde yañıdan quruldı. Bu ikonalar tek patlama vaqtında lavra çan qullesinin yaqınında olğanı için saqlanıp qaldı.

Körgeñiz ikonalar, esas – büyük ve güzel olğan baroko ikonostaslardan birinin parçası edi. İkonostas baş kilsenin diger donatmaları kibi, getman İvan Skoropadskıynın yardımnen

quruldu. Bu işte esas rolü Kiyiv-Peçersk boyacı ustahaneniñ ustaları oynadı.

"Aziz Peçersk baş kilsesi" – ikonostas alt sırasınıñ saqlanıp qalğan ikonalarından biridir. Bu, Podoldaki Mikola Naberejniy kilsesiniñ papazı olğan meşur kiyivli Stefan Lubençenko ustaniñ eseridir. Zamanımızğa qadar yetken bu ikona, Lubençenkoniñ bütün sanat mirasınıñ tek eseridir.

Terminler aqqında bir kaç söz. "Prepodobniy" – Aziz – keşişlik şahıslarınıñ nail olğan bir sıfat, azizlik alıdır. Peçersk lavra azizleriniñ ilk resimleri 1643 senesi, Petro Moğıla tarafından azizleştirilgen soñ meydana kele. Azizlerniñ toplu obrazniñ peyda olması, yunan azizlerniñ degil de, öz lavr soyunıñ ayrıca kösterilmesi, olarnıñ tasviriniñ yaratılması ihtiyacınen sebeplene. İkonada ilk sefer yañı tasvir sheması kerçekleşti. Böylece azizler muqaddeslik timsali olğan lavra panoraması üzerindeki bulutlar üstünde turalar. Eki gruppada şeklinde tasvir etileler: Yaqın qoba azizleri sol tarafta, Antoniy Peçerskiyniñ arqasında, Uzaq qoba azizleri sağ tarafta, Feodosiy arqasında yer alalar. Lavraniñ eki qurucusı keşiş cübbelerinde, ellerinde açıq burğular ile tasvir etilgendir. Yuqarıda sıralar arasında üç qadın tasvir etilgen – elinde bir qulle ile aziz Varvara, knâginâ Ulâna Olşanska ve baş raibe Yefrosiniya Polotska. Kompozitsiyanı "Peçersk Meryem ana" tamamlay: Meryem ana tizlerinde eki elinen er keske hayır duasını etken Mesih ile beraber tahtta, seyircige qarşı otura.

Bu ikonalar misalinde, ikonostasniñ quruluşınen tanış olmağa başlaymız ve bunı nevbetteki zalda yapmağa devam etecekmiş. Böylece, pravoslav ikonostasınıñ eñ ast kısmında Eski Ahttaki süjetlernen temel sırası yerleşmekte. Peçersk Azizlerniñ baş kilsesi ikonası İsanıñ, Meryem ananıñ ikonaları ve aynı zamanda kimge ibadethane bağışlandı ya da belli bir yerlerde ürmek etilgen azizlerniñ ikonaları bulunğan ikinci sırada yerleşe edi. Üçüncü sıra, pravoslav kilseniñ on eki esas bayramını tasvir etkeni içün bayram sırası dep adlandırıldı. Ögümüzdeki ikonostasniñ bayram sırasınıñ on eki ikonasından, müzeyde tek sekizi bar. Bayram sırasından ikonalar yapılğanda, örnek olaraq Avropa gravüraları alındı. Ayrıca, "Qudusqa kirüv" ikonası içün örnek, 1674 yılınıñ meşur "Piskator Bibliyası"ndaki belgisiz müellifniñ gravürası oldı. İkona ressamı gravüra

kompozitsiyanıń esas qısmını akis etti, amma bazı detallerni deńıstirdi, hususan manzara ve Qudusnıń Altın qapılarnıń k r nişini, qulledeki insanlarnı, ketiřatnı seyir etken terekteki eki ođlançıqnı.

İkonalar, Kiyiv boyacılıq mektebiniń y ksek seviyesini k stermektedir. Tamam bu mektep 18-inci asırnıń devamında Getmanlıqnıń esas sanat mektebi edi. Onıń tesiri Volın, Slobojanřına, bazı Belarus regionlarına, hristian Balqanlarđa, hususan Sirbistanđa da yayıldı.

M zeyimizniń kolleksiyasındaki er bir muqaddes sanat eseriniń  z hal s ik yesi bar desek olacaq. Kosmaçnıń  utsul k y nden kelgen ikonalar i  n, Sergiy Paradjanovnıń 60-ncı senelerniń bařında “Unutılđan ecdatlarnıń k lgeleri” filminiń  ekiliři ođurlı bir vaziyet oldu. Dovjenko adına Kiyiv film studiyasında  tkerilgen studiya  ekiřleri i  n ikonostasnıń par aları o devirde faaliyet k stergen Aziz Paraskeva kilsesinden Kiyivge alıp ketirildi. Rejiss r apis etilgen so  olar eki m zeyge ayırıldı. Daa qadimiy ikonalarından bazıları m zeyimizniń kolleksiyasına berildi. B yleliknen, olar mahv olunmaqtan qurtuldılar.   nki 1983 senesi Sovet  k meti, Ekinci cian cenki devrinde milliy areket adisilerinde kilseniń emiyeti aqqında hatırlavlarnı yoq etip, gece Aziz Paraskeva kilsesini yaqtı.

Bundan  ayrı, bu kilseniń tarihi, incitılđan k yl ler i  n řl htadan intıqam alđan efsaneviy “ utsul Robin Gud” Oleksa Dovbuř ile bađlıdır. Yerli efsanelerge k re, kilse k yl ler i  n Dovbuř ve onıń arqadařları ile iřan lı bir k r ř v yeri edi.

Aziz Parakseva kilsesi 1718-1722 seneleri quruldı. Kilseniń mimarlıq dizaynında ve i  dekoratsiyasında Ukrainanıń  arbındaki etnik medeniy bir b lge olđan  utsulřına medeniyetiniń ve yařayışınıń tekrarlanmaz bir hususiyeti akis etilgen.

 g nizde    ikona – ikonostasnıń merkeziy deisus sırasınıń bir par ası. İsa, Meryem ana ve Vaftizci İoan peyđambernı tasvir etken merkeziy ikonanıń adı “Deisus”. Yunan tilinden tercimesi “dua”, ikonada Meryem ana ve Vaftizci İoan namaz qılıp, İsađa muracaat eteler ve insanlıq i  n qoruv isteyler. Tayin etilgen qaidelerge k re, bu ikona ikonostasnıń merkezinde yerleře edi ve er eki tarafından da avariylerniń resimleri ile  ift ikonalar bar edi.

İkona ressamı demokratiya, insanlıq və sadelikkə toqunğan diniy bir şakilniñ güzelligi aqqında öz añlayışına saiptir. Müellif şakilniñ dekorativ umumileştirilmesi için büyük bir istidat köstere. Mavı, yeşil, qaverenki ve parlaq kümüş boyasında sınırlı miqdarda renk olmasına baqmadan, ustalıqnen bir türlü renklerden qaçına.

Obrazlarda bazı shematizm bar, amma özgün obyektlerniñ olması azizlerni tanımağa yardım ete. Petroniñ qollarında anahtar, Pavlo elinen qılıçqa tayana, İncil hristianından biri açıq kitapnı tuta.

Azizlerniñ şekilleri dekorativ oyma kemernen çerçivelengen kümüş bir üzerinde kösterilgen. Em resimniñ özünde, em de arqa planınıñ relyef bezeginde örneknin kullanıluvu halq sanatniñ ve barokko estetikasınıñ bu ikonaların müellifine tesir etkenini bildire. Söz sırası, o bayağı eserniñ saibidir. Buña özüne has üslubiy ve renkli hususiyetler delâlet ete. Alâ daa belli olmağan bu halq ustasınıñ nadir eserleri bizim kolleksiyamızdan ğayrı başqa Kiyiv, Lviv, Olesko, Kolomiya, İvano-Frankivsk müzeylerinde ve şahsiy kolleksiyalarda bar.

Bu zalda, Çernigivdeki Berezna köyünde bulunğan Mesihniñ kökke köterilüv kilsesiniñ ikonastasında 12 eserni köre bilirsiniñiz. Bu ibadethane muqaddes sanatniñ meşur bir yadikârlığıdır.

İkonalar bereznansk şah eserniñ ne qadar muazzam olğanına dair bir fikir bere. Aman-aman 18 metr yüksekliğinde, 22 metr keñliğinde ve içinde qararnen yüz ikona resim obrazları olğan oyulğan ikonostas, ince zevq ve ustalıqnen ayırıla edi. Voznesenska kilsesi, 1761 senesi yerli cemiyet ve qazaq yüzbaşı Yakım Sahnovskıyniñ sımarişinen quruldı. Ukraina halq ustaları eskiden berli yüksek bina qurma qabiliyetinen meşur ediler ve Berezna köyündeki kilse bu halq ananesiniñ müstesna bir örneği oldı.

1936 senesi, kilse yapılarınıñ yıqılma dalğasında, Sovet ükümeti Voznesenska kilsesisini yoq etti. Müzeyimizniñ o vaqıttaki müdiri Pimen Rudâkov bu kibi niyetlerni ögrengende, pek qıymetli eserlerni qurtarmaq için müzey hadimi, sanatşınas Pavlo Joltovskıynı Bereznağa yolladı. Yazıq ki, vaqıt ve kerekli aletlerniñ eksikliği sebebinden Joltovskıy ikonostasniñ müteşem oyma elementlerini söküp olamadı, lâkin 24 ikonanı qurtara

bildi. Şimdi Ukraina Milliy sanat müzeyinde ve Kiyiv Peçersk qoruğında saqlanmaqtalar.

Şimdi seyir etkeniñiz eñ büyük dört ikona, abideviy ikonostasniñ merkeziy qismında - dördünci, deisus dep adlandırılğan sırada buluna edi. Onıñ ortasında, İsanıñ ulu obrazı ile Meryem ana ve Vaftizci İoan buluna edi, bunıñ adı da "Deisus"tır. Yanlarında 12 avari, er eki tarafta 6-şar tasvir etilgen.

Demi, evelki zalda, İsa, Meryem ana ve Vaftizcinen İoan olğan Deisus adlı ikona türünü körmege imkânıñız oldı ve bu sebepten farklı coğrafiya yerlerden kelgen ve yarım asırdan ziyade bir vaqıt içinde yapılğan resimler, üslup ceetinden ne qadar farklı olğanlarını qiyaslay bilesiñiz.

Azizlerniñ resimleri - merasimli ve yücedir. Deisustaki figuralarnıñ abideviyliğine ve renk aenkligine, tafsilâtlı bir şekilde modellengen kerçekçi sımalarğa, qıyafet bezetmeniñ zengin ornamentalleştirilmesine diqqat etiñiz. Avariylar ise yaraştırmadan marumdır, ressam olarnı farklı bir üslup añlamada yarattı: mında diqqat, şekillerniñ tüzlem añlatılmasına degil de, acimiy olmasına ve obrazlarnıñ ferdiyleştirilmesine celp etile. Qırmızı ile qoyu mavı renklerniñ birleştirilmesi daa ölçüli bir gammanı bere. "Deisus" avariylernen birlikte muazzam bir ansamblni yarata, merkeziy ikona özüne has yaraştırıcılıqnen farqlana.

Pencereler arasındaki boşluqta, cennet bağçasındaki guna işleme levhasını köre bilirsiz. İkonostasniñ ast qatında yer ala edi. İkonanıñ müteşem yaldızlı çerçevesine diqqat etiñiz. Bütün ikonostas qararnen böyle körüne edi. İçindeki ajurlı ösümlük örneği bütün yapını toldura edi. Bu sebepten, Getmanlıq devrinde ikona resim yapma ve dekorativ ağaç oymanıñ eñ yahşı örneklerinden biri olğanına inanmaq zor degil.

Bereznadaki ikonalar, aşkâr, farklı zamanlarda ve farklı ustalar tarafından yaratılğanına baqmadan, tek ansamblni kerçeklestire edi, çünki bir - ukrain barokko üslubiniñ köstermesi edi.

Bu resim bizni 17-nci asırnıñ soñu - 18-nci asırnıñ başındaki ukrain arbiy ve devlet erbabı Starodub polkovnigi Mihaylo Aydriyoviç Miklaşevskiy ile tanış ete. O, üç getmannıñ safdaşı edi - Demyan Mnoğogrişniy, İvan Samoyloviç ve İvan Mazepa.

Soñkisi, 1689 senesi Miklaşevskıynı Starodubsk polkunıñ polkovnigi vazifesine tayin etti. Starodubşçına – çoq kere türlü devletlerniñ siyasiy tesiri altına oğrağan Ukrainanıñ şimaldeki tarihiy topraqlarıdır. 1663 senesinden Starodub şeerı çoq sayılı arbiy kapmaniyalarda iştirak etken ve Getmanşçınanıñ terkibinden eñ küçlülerinden biri olğan Starodub polkunıñ arbiy-memuriy merkezine çevirildi.

Meraqlıdır ki, arbiy işlerden ğayrı, qazaq çavuşı reberlik etken bölgeniñ iqtisadiy ve medeniy inkişafı ile de oğraşa edi. Misal olaraq, Mihaylo Miklaşevskıynıñ devrinde Siverskiy ülkesinde faal inşaat başlandı, Starodub şeerı ise ibadethaneler ve keşişhanelerniñ eskileri yañıdan tiklenilgen ve yañıları qurulğan ülkeniñ medeniy ve mimariy paytahtına çevirildi.

Mihaylo Miklaşevskıynıñ resminiñ yaratılma tarixi uzun müddet sır altında qaldı. Ve tek yaqınlarda arxivler tarafından açıldı. 1768 senesi polkovnikniñ defin etilgen Kiyiv-Vıdubıçı keşişhanesinde onıñ resmini qoymağa qarar berdiler. Bunıñ içün torunından, nümüne olaraq qullanıla bilgen Miklaşevskıynıñ, belki de daa sağ olğanında yapılğan resmini istediler. Keşişhanesiniñ keşişlerinden biri oña baqıp kopiyasını yaptı. Amma mında Miklaşevskıy artıq tam boyda tasfir etilgen. 1722 senesi keşişhane qardaşlarınıñ emri ile bir nusxa ğayrıdan yazıldı. O vaqıttan berdi, polkovnikniñ defin etilgen yerinde tura ve bugünge qadar kafedral kilsesinde mevcuttur.

Diqqat etiñiz: müellifler yüzüne degil, çeşit tüslü jupan, polkovnikniñ dindarlığı ve oqumışlığına has olğan atributlarğa daa çoq diqqat berdi. Mesele şunda ki, temsil etilgen resimniñ esas maqsadı şahsnıñ statusını köstermektir. Keten üzerinde tasvir etilgen eşyalar timsaliy mana taşıylar: pernaç iqtidarnı timsal ete, qılıç – arbiy elitağa ait, haçqa kerme – dindarlıq, tuğra ise qazaq soyunıñ timsalidir.

Aşağıdaki yazı Vıdubıçı keşişhanesindeki polkovnikniñ eki kilseni qurğanına delâlet ete. Olardan birinde de Nesvijde ölümünden soñ defin etilgen.

"Arslan ağzını yırtqan Samson" eykeli başta, kiyivli mimar Vasıl Ğrigoroviç Barskiy tarafından 1749 senesi leyhalandırılğan Podoldaki Kontraktova meydanında tiklengen, Kiyivniñ meşur mimariy yapısının – barokko qamereniñ merkezinde yerleşe edi.

Eski zamanlarda, şimdi qamere olğan yerde, Kiyiv halqının muqaddes olaraq sayğan bir çoqraq bar edi. Kiyivde suv ağı peyda olğanda, bu yer onıñ noqtalarından biri oldı. Mında, qomşu Andriyivska dağından temiz suv berile edi. Çeşme eykel fikriniñ ilk körünişi, bugün körgenimizden tamamınen farqlı edi. Suv, "Felitsiyan" adlı melekniñ elinde tutqan kasadan aqa edi.

1777 senesi, qamere damında, Andriy Pervozvaniyınñ madeniy eykelini tiklediler. Bu eykel, Femida ve Mihail baş melekniñ madeniy eykellerini de içinde bulundırğan meydanniñ eykel ansambliniñ bir parçası oldı. Yaqınlarındaki belediye binasınıñ ögünde yerleştirilgen edi. Şimdi Femida ve Mihail eykellerniñ originalları Ukraina tarihi milliy müzeyinde ve Kiyiv tarihi müzeyinde saqlanmaqta. Andriy Pervozvaniyınñ eykel originalı ise bu zalda, Samson yanında yer ala.

1808 senesi kasa ile melek yerine Bibliya qaramanı Samson ile bir arslan figurasını tiklediler. Ve suv endi kasadan degil, arslannıñ ağızından aqa edi.

Üç yıl soñra, 1811 senesi Podolda harap etici bir yanğın oldı, bu yanğında qamere de zarar kördi. Samson ağaç eykeliniñ yanğında saqlanıp qaldımı yoqmı qatıy olaraq bilinmemektedir. Yanğan ya da bozulıp qalğan da ola bilir, ve körgeniñiz eser 1811 yılından soñra yapılğandır. Arhiv malumatı da, 19-ıncı asır boyunca eykelniñ bir çoq yañarmasını qayd ete. Bunı, eykel üzerinde qararnen on qat boya ve astar boya olğanını belli etken boya talili de tasdıqladı.

Eykel müzeyimizge Birinci cian cenkinden evel kelip çıqtı. Büyük ihtimal 1912 senesi, müzeyniñ zallarında "Eski Kiyiv" sergisi açılğanda. Şimdi Kontraktova meydanındaki yañılanğan pavilyonında Samsonniñ beton kopyası tura, qamereni ise Andriy avariyiniñ madeniy kopyası yaraştırıa.

Umumiy adı "Qazaq-bandurist" olğan halq resimleri Ukrainanıñ resim sanatında özgün bir fenomen alına keldi. Olarnıñ inkişafı, tahminen, 17-nci asırnıñ ikinci yarısında başladı. Amma saqlanıp qalğan eserlerniñ çoqusı 19-ncı asırğa aittir. Yani, qazaq obrazınıñ artıq keçmiş azatlıqlarğa asretini köstergen vaqıt. Müzeyimizniñ kolleksiyasında otuz bir böyle resim bar ve Ukrainada eñ büyüktir!

Bu resimlerge dair qullanılğan "halq resim" ıstılası, bu eserlerniñ müellifleriniñ zenaat tasili olmağanınen bağılı. Amma

bazı resimler, janr qaidelerine riayet etip, adını gizlegen ressamların elini bildire, buña köre müelliflerniñ imzaları nadir istisnalar olaraq rastkele. Meraqlıdır ki, ressamların imzasızlığı umumen 19-ncı asırğa has degil edi.

Resimler yalınız keten bezi üstünde degil, em de divarlar, qapılar, araba qapıları, balqurt sepetlerinde ve diger yerlerge yapıla edi. Böyle bir resim evni ve içinde yaşağan qorantanı qoruğanına inanıla edi.

Er vaqıt bu kibi resimlerniñ elementi olğan yazı adetince vertep areketinen bağlıdır. Bu teatr temaşalarında sanağa çıqqan qazaq şaqalı bir monolog ayta edi. Bazı resimlerde 18-nci asırnıñ ikinci yarısından berli belli olğan vertep metinlerden alıntılar bar.

Qazaq yaşayışınıñ türlü saalarinen zenginleştirilgen biraz farklı kompozitsiyağa “Qazaq-Mamay” ayıla. Ukrain tilinde “Mamay” sözü çölniñ köçebe halqlarını, bazıda taş çöl eykellerini tasvir etmek için qullanıla edi. Amma halq bu adnı “Qazaq-aydut, zaporojets, aydamaq, zıpqn” manasında da qullana edi.

Merkeziy resim milliy keçmişniñ romantik timsaliniñ parlaq bir nümunesidir. Paalı jupandaki bir qazaq közge körünmegen çöl arasında emenniñ altında şarqiy bir şekilde oturıp bandura çala. Mında em de bir ikona ressamı merafetine saip olğan bir ihtisasiy ressamnıñ eli aydın körüne. Uyğun şekilde müellif kompozitsiyada mızraqqa bağlanğan zarif atnı yerleştire; qazaqnıñ etrafında barot qutusu, tüfek, şapke ve şişenen qade bar. Emen teregine qılıç, buhurdan ve uydurma tuğra asılğan. Qara ince mıyıq, adiy çizgilernen bir oval yüz qaytsız derecede sakin, azatlıq aqqında teren tüşüne. Tıraşlı başındaki bir tutam saçına, meşur “arınğa” diqqat etiñiz. Kinazlıq zamanlarında böyle bir tutam elitaniñ alâmeti edi.

Bu resimde qazaqnıñ qaramanlıq obrazı ile yazılarnıñ mizahiy mündericesi arasındaki tezat hususan diqqat çeke. Bu tezat, “Qazaq-bandurıstlar” ile bağlı bütün resimlerde has.

Şair ve ressam Taras Şevçenkoniñ sanatı, 19-ıncı asırnıñ ukrain resimi ve keçmişniñ milliy ananesi arasında birleştirilgen bir alqa alına keldi.

Şiiriyet ve tasviriy sanat için yekâne, güzellik ve aenk idealını yarattı, ukrain köylülüğine has etikanı ve klassik Avrupa sanatınıñ estetikasını birleştirdi.

Bir vaxıtlatı müzey, Ekinci cian cenkinden evel Kiyivdeki yañı qurulğan ressam müzeyine teslim etligen Şevçenko eserleriniñ büyük bir toplamına saip edi. Bu sebepten şimdi, sergimizniñ merkeziy yerini, sürgünden qaytqan soñ ve ölümden qısqa bir vaxıt evel 1860 senesi resim yapılğan Şevçenkoniñ öz portreti ala. Portretten, qabiliyeti, istidatı ve şahsiy bahtı taqdir tarafından zalımca yoq etilgen bir insanniñ facialı obrazı peyda ola. Yaşlıq hayalları ile yaşayış kerçekligi arasındaki dramatik kontrast, yolniñ başlanğıcı ile soñu arasındaki güzel til, yarıq ve qaranlıq arasındaki kontrast olaraq ifade etile. Şevçenko bu usulnen, yarıq ve kölge oyunınıñ meşur ustası olğan Rembrandtniñ icadına ayranlığını bildire. Bu, müzeyniñ toplamındaki Şevçenkoniñ yekâne güzel manzaralı eseridir.

Portretniñ etrafında, 1844 senesi yaratılğan "Güzel manzaralı Ukraina" ofortlar seriyasından yapraqlar yerleştirilgen. Vaxıt-vaxıt neşir olaraq planlaştırılğan "Güzel manzaralı Ukraina", seyircini tabiat, tarih ve yurtniñ adetlerinen tanıştıрмаq kerek edi.

Ofortlarniñ romantik-yüksek alı, közge çarpqan yarıq ve kölge oyunu ile qayd etilgendir. "Makeme şurası" kompozitsiyanıñ ölçülü ritmini is etmege tırışınız. Ressam, ananeviy uquqnıñ esaplama ikmetini, yani eski zamanlardan berli Ukrainada bar olğan yazılmağan qaidelerniñ sistemasını, zamanınıñ adaletsiz resmıy makemesinen qarşılaştıra. Bu ofortqa ressam izalı bir yazı qoştı: "Otaman, taacip bir şey olğanda, şura ve makemege köydeki cemaatnı toplar... Cemaat aqıl tanışıp ve razı olğan bir şeyge qarar berip, duşmannen barışıp ya da ceza berip, birer qade pozvovoyadan içip, dağılalar". "Makeme şurası" pek populâr edi ve halq boyacılığında çoq tekrarı olğan edi.

Diger "**Çıgırındaki ediyeler**" ofortı tarihniñ müim bir annı añlata - Getman Bogdan Hmelınskıyniñ qazaq devleti içün bir ittifaqdaşnı saylamasını. Şevçenkoniñ tetqiq etken Markeviçniñ "Ruslar tarihi" ve "Kiçik Rusiye tarihi"nda bu vaziyet, Getmanlıq paytahtındaki elçihanelerge birden üç devletniñ ziyaret etmesi olaraq tasvirlengen. Kompozitsiyanıñ merkezinde türk ediyeleri, eki taraftan da kergin bir bekleyiş içinde çar ve sultan elçileri. Sağ tarafta leh elçisi yarı qaranlıqta otura. Onıñ turuşı, muzakereniñ muvafaqiyesiz keçecegini ifade ete. Terenlikte

qazaq çavuşluğu mesleatlaşa. Şura, qılıçlı bir qazaq tarafından diñlene, bürüştirilgen mañlayı, saylavnın dramatikliginiñ farqında olmasını ve ciddi şübeleri olğanını köstere.

Taras Şevçenko, Rusiye imperiyasınıñ topraqlarında ofort sanatınıñ inkişaf etmesinde büyük rol oynadı. Sanatnıñ bu türdeki muvafaqiyetleri için 1860-ıncı senesi gravüra akademiki unvanını aldı.

Taras Şevçenko öz zamandaş-ressamları için ukrain mevzusını açtı.

Peterburg sakini Lev Jemçujnikov, 1850-nci yıllarnıñ başından berli yaz aylarını Ukrainada keçirdi, halq yırlarını topladı, kobzar Ostap Veresay ile dost oldu ve Şevçenkonıñ şiiriyetini oqudı. Halq destanları ve Şevçenkonıñ “Katerina” poeması ressamnı “Kobzar yolda” romantik resimni yapmağa ilhamlardırdı.

Sanki bir ada tuman ile örtülgen boz manzara üzerinde körüngen kiçik bir bayırda tasvir etilgen yetekleyici ile kobzar. Tüz çölniñ üzerinde bitken dögüşniniñ timsali olğan qarğalar aylanıp uça. Verst diregi – poçta qasabalarına qadar olğan mesafeni köstergen bir yol işareti – vaqıalar Rusiye imperiyası devrinde yüz bergenini açıq şekilde bildire edi. Sade urbağa baqmadan, kobzar ilk nevbette tilenci kibi degil, ilhamlanğan bir yırcı kibi körüne. Kör közleri, közleri körgegen için körülmegen şeylerge çevirilgen. Resim büyük qaraman keçmiş olğan memleketniñ yoqsul zamanesi aqqında ikâye ete.

Başqa bir ressam İvan Sokolovnıñ ömrü Harkiv vilâyeti ile bağlıdır. O, Lev Jemçujnikov, Kostântın Trutovskiy, Taras Şevçenko ile tanış edi. Şevçenko şiiriyetiniñ tesiri altında, o, “Askerlerni özğaruv” eñ meşur resmini yaptı. Bu resimde, insanlarnıñ taqdirini tüşüngen o zamanki ziyalıların ruhunuñ tesiri duyula. Neticede tam bu mizaclar içtimaiy yaşayışnıñ qusurlarını meydana çıkarğan tenqidiy kerçekçilik kibi bir sanat adisesine sebep oldu.

Qarnen örtülgen yolda çanalarnen acemiy askerlerni alıp ketkenlerini köremiz. Olarnıñ peşinden ise yaqınları – keyfsiz qız ile bala ve qartlıq ve qasevetten egilgen ana kete. Sade kompozitsiya, klasik sanatqa has olğan duyğularnı ifade etmekte ağır sabırlıq ve qaramanlarnıñ alicenap qıyafeti samimiy liriklik ile uyğun bir şekilde birleşip, soñ derecede romantik bir obraz yarata.

Kostântın Trutovskıynıñ icadında şarqiy Slobojanşçınanıñ yaşayışı akis etilgen. Romantik, oynaq, halq yaşayışına ayrınlıq ile eserleri em tasil alğan adamlar, em de köylüler tarafından seville edi. Trutovskıy esas janr motivleriniñ nümünelerini inkişaf ettirdi – yahşı kelişilgen iş levhaları, dülber merasimler, sevgi körüşmeleri ve qız eybetlemeleri. Bütün bu janrlar 19-ncı asırda Ukraina ressamlığı için tipik alğa keldi.

Kostântın Trutovskıynıñ resimindeki toyda başlıq parası levhası ufuqta kilse ile köy manzrası üzerinde ola. Andan toy merasiminden soñra toy treni kerı qayta. Uzaqta yağmur sepeley, bu bahtlı bir evlilikniñ alâmetidir. Bulutlardaki boşluqlardan parlaq küneş şavleleri tüşe. Yarıq ve kölge noqtaları personajlarınıñ areketleriniñ canlılığını ve ifadeli olmasını ayrıca köstere. Eserniñ dubarsı, toy merasimi vaqtında yañı bir sevginiñ doğmasıdır. Qızlar arasında bir qırmızı toqumadaki qızını yarıqlatqan parlaq şavlege baqıñız. O, mavı şalvardaki civan bir oğlannıñ zarif endamından közlerini çekmey.

Jemçuynıkov, Sokolov ve Trutovskıy Ukraina yaşayış ressamlığınıñ inkişafına müim isse qoştılar.

Odesa sanat mektebiniñ eñ meşur temsilcisi, pedagog, Odesa müzeyiniñ ilk muafızı Kırıyak Kostandi çoqbalalı yunan balıqçı ailesinde doğdı. Meraqlı şu ki, liman şeerinde yaşap, iç bir vaqıt deñiz resimi yapmadı. Zira o, Kostandi daa 9 yaşında eken, babasını aldı.

Petersburg sanat akademiyasında oquğanda, Kostandi kerçekçiliknen meraqlandı ve şiddetli içtimaiy mevzularğa diqqat etip başladı. Böylece ressam **"İnsanlar içine"** resminde, topraqsız köylülikniñ meselesine toquna. Qız, evini terk etmege ve iş qıdırmağa mecbur qala. Müellifniñ, kompozitsiya yardımınen, qızniñ endamını qalabalıq bir vagon içinde nasıl ayırğanına diqqat etiñiz. Onı yalñız, kök boşluğı ve öz duygularınıñ telâşinen öz başına qaldıra.

Petersburgdan Odesağa qaytqan Kostandi, daa evel resimlerindeki qoyu tonlarını red ete. Ressam, eñ sade motivlerde çeşit renklerini tapa ve tuvğan yerleriniñ civarlarınıñ güzelligini vatandaşlarına açar. **"Erte baar"** resminde usta, endi uyanğan tabiatniñ aydın sevinç duygusını ustalıqnen, muvafaqiyetli bir şekilde ifade ete. Kostandi bu resimni, Odesadaki Uspensk manastırınıñ yaqınlarında yaptı. Anda,

qaravul evçiginde, yazda ailesinen birlikte sıq-sıq yaşay edi. Küneş, parlaq yeşil yaş otnı ve kilseniñ yarım tögerek qubbelerini kümüş yıldıramasinen toldura. Ve bularniñ ortasında - qart keşişniñ figurası, kölgesi de qoyu bir leke şeklinde parlaq yarıqlatılğan yolçıq üzerine tüşe. Ressam mında kerçekçilikke ait zəmanə adiselerge, insan yaşayışınıñ manası üzerine felsefiy düşüncələrge açıq-aydın bir qiymet kesme printsipinden keçə. **"Erte baar"** eseri, 1900 senesi Paris halqara sergisinde tunc medal qazandı.

Kostandiniñ peyzajlarında daa çoq yaz körünmekte. Çünki tamam yazda ressam ders bermekten serbest edi. Bu sebepten icatkâtlıq için daa çoq vaqtı bar edi. Ressamniñ eñ sevgen motivlerden biri - yaz yeşillikleri arasında beyaz qaz sırasıdır. Beyaz tükler, tarlaların zümrüt tonlarını, kökniñ mavısını, küneşniñ batmasınıñ altın ve şarap renklerini akis etip, tonlarnen oynay. İlk baqışta sade ve adiy **"Qazlar"** etüdi, aslında güzelligi ressamniñ ayatındaki eñ büyük qiymeti olğan tabiatqa qarşı ciddi ve titrev bir munasebetnen tolu.

Mikola Pimonenko, 19-ncı asırniñ soñlarında ukrain resim sanatında yaşayış resimleriniñ eñ meşur ustalarından biri edi. Kiyiv resim mektebinde oquğanda Trutovskiy ve Sokolovniñ resimlerini kopiyalay edi. Neticede köy yaşayışı, köy merasimleri ile meraqlandı. Pimonenko sıq-sıq selefleriniñ süjetlerini qullana edi. Amma personajların psixologiyasına ve içtimaiy vaziyetine daa çoq diqqat ayıra edi.

Pimonenkoniñ "Kiyiv guberniyasında toy" adlı ilk resiminiñ süjeti toyniñ ikinci künü keçirilgen "toy yürüşü" eski merasimge esaslana. Yigitniñ evine şeñ ve biraz ayıp türküler ve qırmızı bayraq ile ketken yürüş köydeşlerge kelinniñ bakire olğanını bildire edi. Sarhoş soylarniñ darma-dağın yürüşü manzaraniñ tınc renkleri üzerinde ayırlıp tura. Küzge has olğan hafif keder ve qayğılı keyf resimdeki ikinci dereceli personajların komikligini yımşata ve genç qorantaniñ utanuvını ayrıca köstere.

Pimonenkoniñ ressamlıq ustalığınıñ inkişafına qaynatasınıñ, belli ukrain manzara ressamı Volodimir Orlovskiyniñ tevsiyeleri büyük tesir etti. Oniñ resimlerini siz nevbetteki zalda köreceksiñiz.

Pimonenkoniñ resimleriniñ qaramanları sıq-sıq, Pimonenkoniñ yaz ustahanesi olğan Kiyiv civarındaki bir köyniñ sakinleri edi.

Yerli manzaralar janr kompozitsiyalarının ayırılmaz parçasına çevirildi.

Tahminen yigirmi yıl sonra 1908 senesi yapılgan "İdiliya" resmi ustanın ressamlıq tiliniñ yañı hasiyetini numayış ete. Devirniñ talaplarına uyğun olaraq resimleri yarıq, ava, parlaq renkler ile tolu. Ukrain sanatı içün ananeviy olğan köy manzarası üzerinde aşıqlarnı tasvir etüv Pimonenkoğa aenlklik ve sevinçniñ üküm sürgen mükemmel bir dünyanıñ güzelligini köstermege imkân bere. Personajlarınıñ duyğuları ufaq-tüfek şeylerde körüne. Bu vaziyette, qızlarınñ fal baqqan papadiye çiçegidir. Oynaq eglenceli sanalaştırma ressamda tesirli bir sevgi ikâyesine çevirile.

Mikola Pimonenko Kiyiv resim mektebinde, Sanat mektebinde, Polittehnik institutında ders berdi. Resimleriniñ qoyu renkleri ve yarıq efektleri, ukrain avangardınıñ kelecek klassikleri olğan genç Kazımır Maleviç ve Vasil Yermolovda büyük teessurat qaldırdı. Maleviç öz tercimeialında yazdı: "Ustahanesinde körgenim er şeyden ayran qaldım".

Sergiy Svitoslavskiy peyzaj resmi milliy mektebiniñ ustazlarından biridir. Köçüci Oleksiy Savrasovniñ talebesidir, o, kerçekçilik printsiplerine ardı-sıra riayet ete edi.

Bir kün bir acemiy ressam, Svitoslavskiyğa resimleri içün peyzaj motivlerini nasıl tapqanını sorağanında, ressam sessizce çiftlikniñ qapısından çıqtı, molbertni yerleştirdi ve eki saat içinde çöl bataqlığınıñ acayip bir etüdini yaptı. Ressam közge çarpqan manzaralarnı qıdırmadı. Eserlerinde tabiatnıñ kündelik-nesriy motivleri iç mananı ve şiiriy obrazlıqnı qazanğan edi. Ve peyzajlarğa mıtlaqa insanlarnıñ ve ayvanlarnıñ resimlerini kirsete edi, böylece manzaralarğa ayatıy kerçeklikni qoşa edi.

"Öküzler qarasabanda" resminiñ tışqı sade motivinde, köy ayatınıñ esasları ve onıñ kündelik qıyın emegi aqqında, halqı evel zamandan berli ziraatçılıqnı oğraşqan Ukraina aqqında teren mündericeli ikâye açıqlana. Ufuq sızıǵına diqqat etiñiz. Svitoslavskiyınñ bir çoq kompozitsiyasında açıq-aydın ifadelengen ve sanki resim çerçevesini keñişlete. **"Öküzler qarasabanda"** resminde bu sızıq sabannen sürülgen ağır topraq ile yengil kök arasındaki kontrastnı quvetleştire. Böyle kontrast sayesinde kündelik, sade süjet epik çizgilerni qazana. Kökniñ

mavi-şeffaf tonu ve beyaz-pempe bulutçıqları, tek renkli peyzajğa acayıp baar tazeliği duyğusını ketire.

Svitoslavskiy eserlerinde sıq-sıq Ukrainanıñ bir timsali olğan Dnipronı resim yaptı. Özen yanında ressamnıñ Kiyivdeki çiftliği bar edi. Tabiatta resim yapılğan "**Parom**" resminde, yeknesaq manzara fonunda – tüz bir yerde, sınırsız suv ve ağarğan kökte – insanlar ve ayvanlarnen tolu bir parom közge çarpa. Suv üzerindeki küçük dalğalardan devamlı bir yalı sızığına qadar er şey, özenniñ soñsuzluq, büyüklük tasavurını doğura. Öyle körüne ki, resim aslında sınırsız Dnipro özeniniñ tek ufaq bir parçasını içine ala bildi.

Çarpqa ihtisasiy ustalığını mükemmeleştmek içün barğan zenaatdaşlarınıñ aksine, Svitoslavskiy üç kere şarqqa seyaat etti. Ressamnıñ şarqiy peyzajlarında küneş meydanlığını toldura, onıñ sıcaq sağında renkler bütünley kösterilip başlay. Svitoslavskiy asiya çölllerini, dağ manzaralarını ve "Samarqand bazarı" resmindeki kibi renkli bazarları resim yaptı. Onıñ eserlerinde bediyy obrazlıq ve etnografik tamlığı uzviy bir şekilde bir arada buluna. Orta Asiyada, Pamir dağ aldınıñ eñ uzaq rayonlarında seyaat etkende, Svitoslavskiy daa müim bir vazifeni becere edi – ekzotik quş ve ayvanları yaqalap, öz parasinen yañı qurulğan Kiyiv ayvanat bağçasına yollay edi. Bunda, ayvanları sevgen ve ayvanları çoq resim yapqan ressam, ilmiy bir mananı köre edi.

Sergiy Svitoslavskiy yalınız istidatlı bir ressam degil, aynı zamanda faal bir vatandaş, hayırsever edi: eserlerini hayriye sergilerine gönüllü olaraq bere edi, Qızıl Haç faydasına para yollay edi, sel vaqıtlarında özü qayıqqa minip, insanları qurtara edi. Bazılarına maddiy olaraq da yardım ete edi. 1905 senesi inqilâp vaqıalarında iştirak içün Kiyiv bediyy oquv yurtundan 40 student çıkarılğanda, ressam olarnı askerlikten qurtarmaq içün, öz bediyy studiyasını teşkil etti. Bu arada, bu studiyada bir vaqıt devamında belli ressam ve ukrain avangard nazariyecisi – Oleksandr Boğomazov ve eykelcilikte kubizmniñ esasçısı – Oleksandr Arhipenko oqudı.

İnqilâptan soñ Svitoslavskiy aqqında unuttılar. Usta aman-aman kör oldı ve çalışıp olamadı. Ayatta qalmaq içün, ürmetli ressam qopqalarını qaladı, qazan yaptı, olarnı ötmekke deñiştirdi, qartop östürdi, bazarda sebze sattı...

Sankt-Peterburg Sanat akademiyasının talebesi, Harkiv sakini Sergiy Vasilkivskiy yaz tatilleri vaxtında tuvğan yerleriniñ manzaralarını tasvir etip, seyaat etmege seve edi. 1883 senesi yazda yapılğan etüdler esasında Vasilkivskiy eñ lirik resmlerinden biri olğan **“Ukrainada baar”** eserini yapar. Ressam tesadüfiy olğan er şeyni etüdlerinden ala ve yerge romantik adamsız bir körüniş bere. Aqiqiy manzaradan zamannıñ yavaş-yavaş keçken ve insannıñ tabiat ile ve öz ruhu ile uyğunlıqta yaşağan hayallara dalğan bir yer obrazını yaratar.

1885 senesi Vasilkivskiy Akademiyannıñ altın medalını ve özünü inkişaf ettirmek içün memleket tışına seyaat etmege aq qazana. Avropa boyu seyaat etkende, Pariste Sergiy Vasilkivskiy semetdeşi, ressam İvan Pohitonov ile tanışar. Ve onıñ tesiri altında icadiy tarzını deñiştire. O vaxıttan berli, ressamnıñ arsenalında eñ çoq özüne has olğan, esasen qıymetli ağaçlardan tahtalara yapılğan kiçik mükemmel manzaralardır. Vasilkivskiyannıñ eñ sevimli motivleri arasında özen ve göllerniñ tınç suvlarında akis olunğan erğuvaniy ve altın şefaqlar bar. Bu resimlerde seyaatçı ve avesli avcı olğan Sergiy İvanoviç tabiat ile tek qalma teessuratlarını akis ete edi.

1885 senesi meşur tarihçı Dmitro Yavornitskiy, genç Sergiy Vasilkivskiyğa bağışlanğan ayrınlıq ile tolu olğan maqalesinde ressamnı tarihiy mevzuğa muracaat etmege çağırar: “Bugünden vatannıñ uzaq keçmişine seyaat et ve anda öz resimlerni içün em ilham, em zengin malumat taparsıñ”.

“Qazaqlar çölde” resmi seyircini halq destanarında yırlanğan qazaqlar devrine alıp kete. Vasilkivskiyannıñ tarihiy resimleri folklor obrazlarına esaslanğan, qaramanları adsızdır, bu özü halqtır, tarih ve eposnıñ yaratıcısı. Manzara da resimniñ qaramanı – evel dögüş meydanı olğan çölür ve devriyecilerniñ ufuqnı közetken yüksek mezardır. Bu manzara şekilleri Ukraina medeniyeti içün timsaliydir. Olar resimni keçmişniñ canlı nefesi ile tolduralar.

Ukrain moderniniñ parlaq temsilcisi olğan Vsevolod Maksimoviç, Avropa tarzı sanat alâmetleriniñ milliy ananelernen uzviy olaraq biri-birine keçkeninen meraqlıdır. Ressamnıñ sistematik zenaat tasili yoq edi. İlk ihtisasiy beceriklerni Poltavada, meşur ressam-köçücü Grigoriy Myasoedovnnıñ oğlu – İvan Myasoedovnnıñ reberliginde aldı. Bir vaxıt devamında

Moskvadaki Fedor Rerbergniñ studiyasını ziyaret etti, onıñ tesirinen Britaniya ve Ukraina-Rusiye meşur moder tarzı ustaları – Odri Berdsley ve Mihaylo Vrubel icatlarından meraqlandı.

Vsevolod Maksimoviç, azaları antik devirniñ sanat ideallarına bağlı olğan ve çıplaqlıqı tatbiq etken İvan Myasoedovniñ "Tañrıların bağçası" adlı Poltava tögeregine kire edi. Bu sebepten, Maksimoviçniñ bir çoq eserinde, qadimiy yunan sanat ananelerini akis etken yaş çıplaq vucutniñ güzelligi maqtap yırlanğandır. Ressam bogem bir ayat yaşadı, futuristler Vladimir Mayakovskiy, David Burlük, Velimir Hlebnikov, Vasil Kamenskıy ile yaqın temasta buluna edi. 1914 senesi "№13 Futuristler kabaresinde facia" adlı filimde şair – baş rolünde oynadı.

Maksimoviçniñ "Öz portreti"nde dekadans devirniñ nümüneviy bir temsilcisini – nartsisizmden marum olmağan zarif bir centlmenni köremiz. Amma yahşı forsa tış taşqınlıq arqasında gizlengen bir keder körünmekte. Ğaliba, yaş adam yaşayış ve ölüm olğan eki ebediy başlanğıçniñ aslını añladı. Ve ekincisini saylay. Maksimoviç yigirmi yaşında özünü öldürdi. **"Öz portreti"**ne daa diqqatlı baqınız. Resimniñ sızıq ağınen qaplı fonniñ ortasında qafa taslarını – ölüm timsalini körmege mümkün. Ressam bu eserde taqdirini kodlağan kibi körüne.

Vsevolod Maksimoviçniñ resimlerindeki yarıq ep üslüpleştirilgen ve şartlı. Güzel **"Maskarad"** pannosında ögümüzde bir perde açıla ve qaramanları marionetkalarını añdırğan bir teatr areketi kerçekleşe. Mücizeviy bir örneklerden şekillengen örümçek lifi üzerinden körüneler, maskalar altında betlerini saqlaylar ya da aşağı baqalar. Müellif bu usulı qullanıp, uydurma ve kerçeklik arasında belli bir mesafe duyğusını yarata. İstizalı groteskli obrazlar, resim virtuozlıǵı, modern tarzınıñ klassigi olğan Britan grafikacı Aubrey Beardsleyniñ eserleri ile tedaiylerni uyandırılar.

"Öpüş" resimniñ motivi, Gustav Klimtniñ aynı serlevanı taşığan eseri sayesinde moder sanatında keniş bir populârlıqı qazandı. Vsevolod Maksimoviç eserlerinde faal olaraq eki renkni qullana – qırmızı ve qara. Bu timsaliy renkler yalınız qadimiy yunan zamanlarınıñ savut resim yapmanı degil, aynı zamanda ressamniñ doğğan ve ösken Poltavanıñ halq ustalarınıñ eserlerini de hatırlata. Qaramanlarını figuralarını şartlı-örnekli fonnen birleştirgen müellif, nazik duyğularnıñ aniy taşqınlıǵını ebediy,

tabiiy olmağan sevginiñ bir işareti alına ketire. "Öpüş" resminde müellifniñ şahsiy duyğularınıñ terenligi de is etile. Maksimoviç, şaire - futurist Nadiya Nikolayevağa sevdalandı, amma qarşılıqsız aşq oña acı berdi. Büyük ihtimal, bu facialı ihtiras, aynı zamanda ne muvafaqiyet, ne de para ketirgen şahsiy serginiñ muvafaqiyetsizligi, Maksimoviçni özünü atmağa sebep oldı.

Facialı taqdirni tek ressam degil, eserleri de yaşadı. Aman-aman yarım asır devamında seyirci içün irişilmez oldı. Maksimoviçniñ eserleri müzeyimizge 1930-ıncı yılları kelip çıqtı. Eserlerni millerge burdılar ve olar sanatniñ "formalizm" kibi tamğadan qurtulğan ve ukrainalı ressamniñ acayip, özgün istidatını qiymetlendirilecek zamannı beklemege mecbur qaldılar. Bugün Vsevolod Maksimoviçniñ ressamlıq ve grafik eserleri müzeyde, yerli ve çetel sergilerde muvafaqiyetnen sergilenmektedir.

Mikola İvasük, XIX asırda Avstriya imperiyasınıñ terkinde olğan Bukovında doğdı. 1893 senesi Münhen Sanat akademiyasında oqup, İvasük "Boğdan Hmelniçkiyniñ Kıyivge kirmesi" tarihiy resim üzerinde çalışıp başladı. Resimdeki tarih - 1912 senesi - ve tamamlanğan yer - Viyana kösterilgen. Amma, ressamniñ qızı Olenaniñ bildirgenine köre, ressam daa soñra ayrı ufaq-tüfek şeyler üzerinde işlemege devam etken... Ve ketenge soñ boya yolağını Kıyivde 1932 senesi qoyğan.

Resimde getman, Qazaq devletiniñ yolbaşçısı Boğdan Hmelniçkiyniñ Kıyivge tantanalı kirmesi tasvir etile. Adise 1648 senesi dekabrniñ 23-nde oldı. Poloniya şlâhtasına qarşı milliy qurtuluş cenkiniñ ilk yıllarında Qazaq ordusu bir sıra parlaq ğalebeler qazandı - Jovti vodi, Korsun ve Pılâvtsı yaqınlarındaki uruşlarda. Bu, Hmelniçkiyniñ eñ büyük ğalebesiniñ vaqtı edi.

O kün, XI asırda qurulğan Kıyivniñ esas qapısı olğan Altın qapılar yanında ğalıplarnı şeer sakinleri, Kıyiv kollegiyasınıñ talebeleri, ruhaniyeler qarşıladı. Kıyiv mitropoliti Silvestr Kösiy, mor yapınca ile qara mitropolit qalpağı ve elinde mitropolit اساسınen tasvir etilgen. Yanında, altın ile tikilgen beyaz ştanda, başında güzel bezetilgen mitra ile kilse işlerinen Kıyivden Moskvağa ketken Qudus patriarhı Payisiy. Sağ qolunen Qudus patriarhı Payisiy Hmelniçkiy ve qazaqlarnı alğışlay.

Getman, ğalebe qazanğan ordunıñ serdarı kibi beyaz at üstünde kete. Bayraq üstünde, Hmelnitskiynıñ de tuğrası olaraq sayılğan "Sirokomlnıñ" tuğrası tasvir etilgen. Resimde pek çoğ, ğalebe, saf sevinç ve Mesihniñ doğma timsali olğan beyaz tūs. Daa qaramanlıq, ululuq timsali olğan qırmızı tūs de yahşı körüne. Vaqianıñ tantanası paalı basmalarınıñ zengin yılıtraması, altın tikme ve silâ ve zırhlı taqım parıldaması ile ayrıca kösterile. Adise, körünişi ressamnıñ hayal küçü ile biraz deñiştirilgen Sofiya baş kilsesi üzerinde ola. Bir talay adam arasında sol tarafta qadimiy kiyimde olğan üç qadıńa diqqat etiñiz. Bular Mıkola İvasükniñ apayı ve qızlarıdır.

Tarihiy bir adiseniñ tasvirinde ressam devriniñ esas ğayesini qoya - İmperiyalarınñ sınırları ile bölüngen Ukraina halqınıñ Kiyiv etrafında birleştirmege ıntıluv.

1937 senesi Mıkola İvasük Sovet akimiyeti tarafından basqılarğa oğratıldı, resim ise yoq etilmek için "mahsus fondğa" berildi. Müzey hadimleriniñ ğayreti ile resim qurtarıldı, 1972 senesinden berli ise resim müzeyimizniñ daimiy ekspozitsiyasındadır.

Abram Maneviçniñ icadında, Kiyiv sanat oquv yurtında menimsegen kerçekçilik peyzajnıñ ananeleri, Münhen sanat akademiyasında öğrenen impresionizm, postimpressionizm ve modern usulları ile uzviy bir şekilde birleştirilgendir.

"Vatanım" eserinde, bugün Belaruste bulunğan Mstislavl soqaqlarında keçken balalıq teessuratlarını yañıdan yarattı. Qararğan tahta evler arasında, ağlağan kök altında, ustanıñ bir çoğ eserinde üküm sürgen sessiz keder duyğusu doğa edi. Peyzajnıñ alı minimalistik-minor renklernen kösterilgen. Birinci planda tasvir etilgen yalnız qara tekeniñ ifadeli silueti, ğaliba, bu, Tañrı tarafından unutulğan köşede üküm sürgen ümitsizlikniñ bütün küçünü özünde toplay. Ressamnıñ bu kibi "fuqareleşme ve kenişlik, keder ve tuvğan tabiatnıñ tebessümü"ni köstergen peyzajları, meşur Duran-Ruel Paris galereyasında muvafaqiyetli bir şekilde sergilendi. 1913 senesi anda Maneviç eserleriniñ, yaş ukrain ressamğa Avrupa tanılmasını ketirgen şahsiy sergisi açıldı.

Maneviçniñ şeer peyzajlarında eñ çoğ kamera, şeer alâmetlerden marum köşeçikler celp etile edi. Ressam **"Kurenivkada baar"** resmindeki Kiyiv civarı manzarasını

turmuşniñ parlaq şiiriyetinen toldura. Tereklerini qoyu konturlarını açıq-aydın grafİKası özüne has bir örneğini yarata. Bu terekler resminde çizgi seyirinen, plastik imkânların üslubiy modernge yaqınlıq farq etile. Qısqa keskin bir boya yolağı resim üzerine areketlilik bere. O, ressam eserlerini, ukrain şairi Vasily Stusniñ aytqanı kibi, " lirik-fosforik yarığı "ndan şekillengen atomdır.

Maneviçniñ daa soñraki peyzajları, bularniñ arasında **"Vilâyet. Mart"**, parlaq renklerden qurtulalar. Terek ve evlerini, monohrom özgünlükni çevre sızğan qara kontur, dünya aenikini bozğan qasevet duyğusını doğura. Maneviçniñ 1910-uncı senelerini soñundaki eserlerini emotsional alı, tek memleketniñ facialı vaqıaların anlatılmay. 1919 senesi şahsiy bir facia kerçekleşti - Tripillâda, sovet ükümetine qoltutğan yaş komsomolcular arasında Maneviçniñ 17 yaşındaki oğlu qurşunğa tizildi.

1921 senesi ressam Vatanını taşlap, qalğanların ABD-ne yerleşti. Anda muvafaqiyetli bir şekilde çalışmağa devam etti - er yıl şahsiy sergileri keçirile edi, onıñ istidatın belli alim Albert Einstein meraqılana edi. Daiy fizikacı endi pek ağır hasta ressamğa: "Ekimiz de yıldızlarğa hizmet etemiz. Sen bir ressam, men ise bir alim olaraq", - dep yazdı.

Amma muvafaqiyetke baqmadan, ressamniñ gönlünde, 1909-1910 seneleri birinci şahsiy sergisi kerçekleşken Kiyiv ve Şeer müzeyiniñ hatırası er zaman bar edi. Maneviçniñ vasiyetini yerine ketirgen qızı Lüsâ, müzeyge ressamniñ 50 eserini ediye etti.

Oleksandr Muraşko ressam karyerasını evelki güzellik idealları keçmişke doğru çekilgen zaman başladı. Yaratıcılıq qanunlarına ve atta dünyanıñ özüne baqışları yañıdan baqılğanda. Muraşko zamannıñ talaplarını, deñişmelerini duya edi. Dünyanı tenqit etmedi, oña şair kibi baqa edi. Ressam, predmet ve feza ayrı olğan aqiqatniñ hayaliy-kerçek kösterüvi ile meraqılanmay. O, madde, yarıq ve fezanıñ ayırılmaz birliğini köstermek için cesaretnen formalarnı umumileştire. Ressamniñ sanat tili yaraştırıcı, küneşni qıdıruv ile tolu, renklerini intensiv açıqlığı ile ifade etilgen.

Sankt-Peterburg sanat akademiyasını bitirgen soñ Oleksandr Muraşko Paris ve Münhenge kete. Anada o impressionist-

plenerizm üslûplerni, yarıq effektlerni ögrene. Modern ustalarında yañı yaraştırıcı ve plastik çezmeler qıdırdı. Buña **“Parisli qadınlar. Qavehane yanında”, “Parisli qadınlar”** eserleri delâlet ete. Amma olarda ressam realistik portret sanatınıñ ananelerine sadıq qala. Çünki genç ressam Peterburg akademiyasında tanılğan ruhiyat portreti ustası İllâ Repinniñ ustahanesinde oqudı.

Portret janrı Muraşkonıñ yaratıcılığında üstün oldı. Turuş, el-qol oynatuvı, aksesuarlar, özü sanat şekli – bütün bular ressamağa modelniñ şahsiyetini pek yahşı şekilde köstermege yardım ete edi. XX asırnıñ başında keñiş tarqalğan ve eserge janr qoşqan portret-resim şeklini qullana edi. Bunı **“Krosna arqasında. Olena Prahovaniñ portreti”, “Çana üstünde. Oleksandra Muraşkonıñ portreti”, “Tıynaq yanında. Margarita Muraşko – ressamnıñ apayı”** eserlerinde köre bilemiz.

“Köylü qoranta” bu da portret-resimdir. Resim qaramanları, ressamnıñ Poltava vilâyetindeki Luçkı köyünde resimlerini yapqan kerçek insanlardır. Müellif qaramanlarını arekette degil, insan munasebetleriniñ, duygularınıñ ve tüşünceleriniñ iç dünyasınıñ açılğan uzun bir tenefüste tasvir ete. Bu qorantanıñ obrazları qartlıqnı ve gençlikni, keçmişni ve kelecekni birleştirdi. Olarnıñ tabiatında muayyen bir qorantanıñ çizgileri ve ukrain köylülüğiniñ umumiy çizgileri bir yerge keldi. Qırmızı, sarı-yeşil, beyaz ve mavı boyalarınñ büyük tüzlemleri sanki şekil yapa, obrazlarğa hususiy, epik emiyet bere.

Ustanıñ eñ soñki eserlerinden biri, dünyağa yaraştırıcı baqışınıñ yüksekliklerine yaqınlaşqan **“Çiçekçi qadınlar”** resmidir. Qadınlarnıñ raat yerleşken teren, suvuq mavı kölge, sanki yüzleriniñ çizgilerini sile. Amma er biriniñ turuşında, elleriniñ bulunğan yerinde (qartnıñ qıyafetine baqıñız) tabiat ve atta taqdirni körmek mümkün. Resim yapıp bitirilmegen qaldı, çünki Muraşko onı Kıyiv soqaqlarından birinde yapa edi ve yaqqan yaz küneşinden közlerinen problemalar başlandı. Lâkin tam bu resimniñ özüne has cazibesidir. Boyalarnen tolğan ve temiz qalğan resimniñ kontrastı renk küçüni, tolğun güzelligini ve yaşayış sevinçini daa da keskin şekilde is etmege imkân bere.

Oleksandr Muraşko milliy sanatnı Avropa sanasına çıkarğanlardan birincisidir – onıñ resimleri Paris, Amsterdam,

Venedik, Almaniyaniñ bir çoq şeerlerinde keçirilgen sergilerde numayış etildi.

Oleksandr Muraşko, Ukraina medeniyetiniñ temsilcilerini sıqıştırgan sovet rejiminiñ ilk qurbanlarından biri oldı. 44 yaşındaki ustaniñ yaşayışı istidatına ilk adımlar atıp başlağan vaqıtta toqtadı.

Fedir Krıçevskıyniñ balalığı, güzel manzaralı tabiatniñ arasında Sumı vilâyetiniñ Vorobja köyünde keçti. Köy yaşayışı, adetleri, ananeleri, halq ustalarınıñ eserlerinen bağı teessuratlar ressamniñ estetik zevqlarını ömürlük şekillendirdi. Krıçevskıyniñ icadında, sanatta asırlarnıñ deñişme vaqtında aktual olğan milliy mevzuı esas yerni ala.

Emiyetli bir şekilde bu mevzu, Petersburg sanat akademiyasını bitirgende yaş ressamniñ taqdim etken **"Kelin"** adlı diplom işinde yañğıradı. Resmin süjeti olaraq eski ukrain adeti - kelinniñ toyğa azırlanması saylandı. Eserniñ qaraman prototipi, Poltava vilâyetiniñ Şışakı köy sakini Hristâ Skubiy oldı. Ressam anda uzun bir zaman yaşadı ve öz ustahanesi bar edi. Pişkin ve dülber, qadın güzelliği aqqında halq tasavurını temsil ete. "Niva" mecmuası, "tavlı, gururlı ve bahtlı" - köy kelinini çariçe ile qıyaslap, resimge bir tefsir yazdı. Krıçevskıyniñ sade tür motivi tantanalıq ve epik bir kenişlik qazandı. Resimniñ bütün alanında yer alğan ifadeli bir şekilde belgilengen qadın figuraları, ressamlıqnıñ dekorativ hususiyetleri umumiyleştirilgen şekillerinen birlikte eserge abideviylik bir duyğu bere. Böylece, acemiy ressamniñ diplom işi, onıñ kelecekteki icadınıñ programması oldı.

Fedir Krıçevskıyniñ Akademiyadan alğan paranen Avropağa yapılğan bir seyaat vaqtında, ressam modern tarzınıñ temellerini icadiy bir şekilde ögrene. **"Altın fon üzerinde Lidiya Staritskayaniñ portreti"**niñ ressamlıq usullarında Viyana Setsessionniñ tesiri körünmekte. Bu ressamlar birliği 1897 senesi efsaneviy Gustav Klimt tarafından quruldı. Klimtte kibi, Krıçevskıyniñ eseri eki ressamlıq şekilniñ - qadın obrazınıñ kerçekliği ile dekorativ fonniñ şartlığı üzerine qurulğandır. Ve aynı zamanda milliy yavluqnıñ parlaq renkleri, altın fonniñ sıcaq ıltıraması eski ukrain ikonasınıñ tedaiylene. Qaramannıñ özüne has turuşı, acimiy yüzniñ urbanıñ tüzlem örnekligenin birleşmesi - 18-inci asırniñ ukrain portret resminiñ ananelerine kelişe.

Oleksandr Boğomazov – kubofuturizminin temalcilerinden biri olğan ukrain avangardının lideri ve nazariyecisidir. Boğomazovnin daa Kiyiv sanat oquv yurtunda dostlaşqan ressam ve ressam-sanalaştırıcı Oleksandra Eksterden sanatçı Avropanın yañı sanat ceryanları – fovizm, futurizm, kubizm aqqında malumat aldı.

1908 senesi Boğomazov Oleksandra Ekster, David Bürlük, Mihaylo Larionov ile beraber Kiyivdeki “Lanka” sergisinde iştirak etti. 1914 senesi Ukrainanın genç avangard ressamlarını birleştiren Kiyivnin sanat ömründe müim bir serginin teşkilâtçısı ve iştirakçısı oldu.

Aynı 1914 senesi Boğomazov “Ressamlıq ve elementler” adlı müim nazariy işini tamamladı. O, formanın inkişafını avangard sanat ceetinden araştırdı.

Oleksandr Boğomazov şeer ressamı edi. Kiyiv aqqında böyle yazdı: “Kiyiv plastik köleminde güzellik, türlü ve teren dinamizm ile tolu. Mındaki soqaqlar kökke yeteler, şekiller kergin, sızıqlar energik, yıqılalar, sınalar, yırlaylar ve oynaylar. Yaşayış tezligi, Dnipronın tınç sol yalısında yerleşkenine qadar keñiş yayılmağa fırsat bergen bu dinamizmni daa ziyade qayd ete”. **“Şeer manzarası. Çölmekçiler”** resmi eski şeerde kubo-futuristik bir baqışnıñ nümunesidir. Şekli deñiştirilgen nesneler landşaft dinamikasını nasıl ifade etkenine diqqat etiniz.

1920 seneleri Boğomazov Kiyiv sanat müzeyinde ocalıq yaptı. Onın oqutuv sisteması avangardğa has olğan formağa taliliy yanaşmağa esaslanı edi.

Bu zaman ressam izçenliknen ressamlıqta pıçqıcıların iş mevzusını inkişaf ete. Mevzu saylavı sanatta ilk nevbette işçilernin emeginen bağı olğan demokratik mevzularnın tarqalğan devirge hastır. Diger taraftan, bu: ressamın evel şekillengen öz nazariy printsiplerini ameliyatta qullanğan zaman, pişkin avangard için körümlü bir eserdir. Pıçqıcıları çoq sayılı resimlerinde ve sanat eserlerinde tekrar-tekrar tasvir etken usta, renkniñ hususiyetlerini araştıra.

1927 senesinin **“Pıçqıların masatlama”** eserinde müellif tasvir etilgen sananın ikâyesinden qaçına, süjet onı meraqlandırmay. Ressam renk şeklini kelüv emiyetine diqqat ete. Boğomazovnin sözlerine köre, o, “sızıqlar ve lekeler uyğunluğu ile ressamlıq ğayesini ömürge keçirgen”.

Kıyiv 1918-1920 yıllarının sanat ayatını Oleksandra Eksterniň bediyy studiyasız tasavur etmege qıyın.

1916-1917 seneleri Moskvadaki Kamera teatrinde keçirilgen çalışma vaqtında, o, levhagrafikaniň original kubik futuristik çezimini tüşünip çıqardı. Daa soňra, 1918 senesi, endi Kıyivde, Bronislava Nijinskayaniň studiyası ile işbirliğinde, Ekster bu eksperimentlerni inkişaf ettirdi. Böyleliknen, Anatoliy Petritskiy, Vadım Maller, İsak Rabinoviç ve başqa kibi teatr dizayniň ukrain ressam-yañılıqçıları tögereginiň şekillenmesine tesir etti. Olarnıň adlarinen 1920-nci yılların yerli teatrniň inkişafı bağılıdır. Eksterniň pedagogik faaliyeti daa 1915-inci seneleri, halq zenaatların yañıdan tiklenmesinen, artellerde başladı. Ressam mında halq sanatınıň printsiplerini tetqiq etti ve öz kubik futuristik kompozitsiyalarını işlep çıkara edi. Daa soňra nağış ustaları olarnı çeşit eşyalarğa keçire ediler.

Eksterniň ders bergen artellerni, ressamlar Nataliya Davidova ve Yevgeniya Pribilska teşkil etti. Tamam olarnen, arqadaşlarinen birlikte **"Üç qadın figurası"** resminde Ekster özüni tasvir etti. Müellif, geometrik şekillerge ve faal renklerge diqqatını topla, portret beñzemesine körmemezlikten keldi.

Bediyy faaliyet, oqutma ve levhagrafikadan ğayrı, Ekster kinonen de oğraşa edi: urba tike ve kostümler yarata edi. Hususan, rejissör Yakov Protazanovniň "Aelita" fantastik filmi içün.

Oleksandra Ekster, fikirdeşlerni bir arağa ketirdi ve eñ yañı sanatı populârlaştırdı. 1908-inci senesi "Lanka" ve 1914-ünci senesi "Kiltse" ("Yüzük") kibi sergilerde iştirak etti. Bu sergiler Ukrainada avangardniň olğanını kösterdi. Ressamniň küç-quveti sayesinde 1919 senesi Kıyivde bediyy "Ğermes" adlı almanah neşir etildi. 1920-nci senesi Ekster Moskvağa köçti ve anda ilerideki üç yıl Yüksek Bediyy-Tehnik Ustahanelerinde ders berdi. 1924 senesi Pariste yaşadı.

Oleksandra Eksterniň icadı, öz bediyy baqışını tapmadan evel, impresionizmden fovizm ve kubizmge doğru inkişaf ete edi. Oleksandra Pariste oquğanda, eñ yañı Avropa sanatinen tanıştı. Pablo Picasso ve Georges Braque fransız kubistlerniň derslerini benimsegen ressam, analitik kubizmni tili ve bütün sistemasına pek yahşı bir şekilde saip olğanını kösterdi.

Bu devirniñ eñ yahşı eseri - **"Köpür. Sevr"**, Eksterniñ palitrasını, şekillerde diqqatını topla, tutqanı bir resim. Tabiat, Ekster içün tafsılâtlı tetqiqniñ obyektı ola, ressam, bulut areketiniñ, tumanniñ, yarıq aqımınıñ ve mimarlıqnıñ statik şekilleriniñ tesirleşmesini bildirip, kerçek proportsiya ve ritmlerni tekrar işlep çıqara.

Köpür mevzusu, Oleksandra Eksterni bir sıra eser yaratmaq içün ilhamlandırdı ve bu eserlerde köpür eki yalı arasındaki bağı timsal ete: aslında bu, Avropanıñ Şarq ve Ğarp tasviriy medeniyetiniñ, ananeniñ ve zemaneyilikniñ birleşken mevzu, ressamniñ sanatınen aenkdəştir.

Bu hususiyetni, Eksterniñ zamandaşı, rusiye oyuncısı Alisa Koonen qayd etti: "Onıñ evinde, onıñ içindeki kibi, Avropa medeniyetiniñ ukrain turmuşınen birleşmesi diqqat çeke. Divarlarda, Picasso, Leger ve Braqueniñ resimleri arasında ukrain nağışlarını körmək mümkün edi, yerde toquma ukrain kilimi bar edi".

Semen Yoffeniñ "Tirde" resminiñ ikâyesi ile "mahsus fond" añlamniñ tarihi ile tanışıp olasıñız. Sabıq Şuralar Sotsialistik Cumhuriyetler Birliğindeki bazı müim müzeylerniñ hususiy kölletsiyaları - "mahsus fondları" bar edi. Olarnıñ maqsadı ferit ya da nadir eserlerni qorumaq degil, aksine, Sovet rejimi tarafından kereksiz eserlerni qullanuvdan çıqarmaq edi. Böyle fondlarğa tüşken artefaktlar ya da insan közünden uzaqqa saqlanıla edi, ya da yoq etile edi.

1937-39 seneleri teşkil etilgen Mahsus gizli fondumuzğa Harkiv, Odesa, Kiyiv, Poltava ve Ukraina sanat sergisiniñ mahsus fondlarından fırqa mefkürecileriniñ fikrince "kerçeklikni deñiştirgen" ve "yañı cemiyet" içün telükeli olğan "halq duşmanları", "formalistler", "milletçiler"niñ işleri ketirile edi. Böylece, Ukraina milliy sanat müzeyiniñ Mahsus fonduna Oleksandra Yekster, Oleksandr Boğomazov, David Bürlük, Viktor Palmov, Oleksa Grışçenk, Onufriy Bizükov, Neonila Ğritsenko, Semen Yoffe ve diger ressamlarınıñ resimleri kelip tüşti. 1939 senesi yoqlama defterinde 1747 eser edi.

1960-cı yıllardan başlap Mahsus fondan eserlerni daimiy sergige qoşıp başladılar, 1987 senesinde ise Mahsus fondniñ büyük talili başlandı. Qaytarılğan eserler arasında Semen Yoffeniñ "Tirde. Atıcılar töğeregi" resmi bar edi.

Ressam aqqında pek az malümat saqlanıp qaldı. Semen Yoffe 1909 senesi martnıñ 12-de Konotopta doğdı, 82 yaşında vefat etti. O, Harkiv sanat institutını bitirdi, İvan Padalka ve Vasıl Yermılovda oqudı. Teatrde ressam-sanalaştırıcı olıp çalıştı.

Onıñ “Tirde. Atıcılar tögeregi” resmi 1932 senesi yapılğan ve Oktâbr inqılâbından soñ peyda olğan “yañı qadınnıñ” obrazınıñ tasdıqlavına bağışlanğan. Bolşevikler, proletar erkek ile beraber aq ve mecburiyetlerge saip olğan, iş ve içtimaiy faaliyette faal olğan “yañı qadın – sotsializm qurucusı” bir leyhanı teklif ettiler... Qadınlarnı arbiy işler ile oğraşmağa rağbetlendire ediler – ayrı qadın müfrezeler, arbiy atıcı tögerekler teşkil etile edi. Qadınlar erkekler kibi silâ taşıy ediler, zabıt ola bile ediler.

Ressam bu meyilni akis ete. Tirde küçlü sert, qollarında silânen eki qadınnıñ figurasını köremiz. Qadınlar tam boyunda monumental olaraq kösterilgen. Tir olar içün kiçik kibi körüne, başları tavan yanında, oda pek tar. Renkler qoyu ve şiddetli, qoyu qırmızı, qaverenki tüsler çoq. Böyle etip, ressam qadınnıñ cemiyetteki büyükligini, emiyetligini ve yañı rolünü ayırıp köstere.

“Tirde” ressamnıñ saqlanıp qalğan yekâne resmidir. Müellifniñ teatr taslaqları da pek az qaldı. Olar, Semen Yoffeniñ çalışqan Harkiv şeerindeki teatrde yanğın vaqtında yandı.

Renessans ustalarında kibi, Fedir Kriçevskiy icadınıñ esas mevzusu – emek, qutlama, sevgi, küreşte belli olğan bir insanın büyükligi ve menliktir. 1920-nci senelerniñ ortalarında, ukrain renessansınıñ zamanında, ressam, eski ukrain boyacılıqnıñ üslubını modernin zarif plastikliginen birleştirgen “Ayat” triptihi üzerinde çalıştı. Bu triptih, 20-nci asır ilk çeriginiñ dünya medeniyetindeki büyük ve facialı deñişmelerni añlama deñemesi olup, pişkin ustanın ayatıy ve icadiy tecribesiniñ neticesi oldı.

Er bir resim muhtardır, mustaqıl bir kompozitsiyağa ve öz süjetine saiptir. Episi birleşkende, ikonostastaki ikonalar kibi daa teren mananı taşıylar. Ukrain ikona resim yapmanın böyle “zemaneviyleştirilgen” adeti, em triptihniñ umum dekorativ fikrinde, em de yaşayış adiselerge, muqaddes “sırlarğa” kibi munasebette farq etile.

Böyleliknen, triptihniñ sol qısmı sevgige bağışlanğan. Aynı zamanda insan yaşayışınıñ birinci devrini – samimiy ikâyelernen ve furtunalı duyğulernen tolu bir baarnı temsil ete.

Triptihniň merkeziy qısmı aileni tasvir ete. Üç nesilniň figuraları, yahşılıq ve aenk tolu bir oba alında toplana. Aziz bir Aile kibilerdir. Üstteki altın dekorativ tabaqlar nimblerni aındırğanı nafile degil. Künaylannıň tasviri ayrı bir mananı taşıy – bu, em yaz mahsulınıň bolluğı, em de ğayıpları endi belli olğan bir aile müitidir...

Triptihniň soň sağı qısımında, facianıň aenkni bozğanını köremiz. Oğul cenkten ayaqsız qayta, anası ise kederden ve ayatta qalğanı içün sevinçten ağlay. Baba ögden tasvir etilgen, baqışında: "Böyle olmalı mı?" ve "Başqa türlü ola bilirmi?" sualleri oqla.

1928 senesi triptihniň merkeziy qısmı, Venedik Bienalinde ukrain sergisiniň incisi oldı.

Volodımır Kostetskıynıň **“Qaytuv”** resmi ilk baqıştan cenkten soñraki resim sanatına has olğan bir mevzuda sotsialistik kerçekçilikniň tipik bir nümünesidir. Resimge daa diqqatlı baqqanda müellifniň cenkni fırqa memurları körmek istegen qaramanlıq kibi degil, şahsiy faciası olğanını ańlamaq mümkün.

Süjet ressamnıň ömründen bir levha esasında qurulğan. Biň doquz yüz qırq birinci senesi Lubnıda areket etken ordu terki binde olup, Kostetskıy bir künlik izin alıp qorantasinen körüşip oldı. O vaqıt anda ağır mudafaa uruşlar edi. Resimde apayı ve oğlunen qısqa bir körüşöv anni tasvir etti.

Bu resimni Kostetskıy biň doquz yüz qırq yedi senesi yaptı. Bu resimni yapqan zaman, qorantasını endi altı yıldır körmegen edi. Ve biň doquz yüz qırq bir senesindeki körüşöv soñki olğanını bilmey edi. Kıyiv azat etilgen soñ ailesi Avstraliyağa tüşti ve Volodımır olarnen artıq körüşip olamadı.

Uzun müddet Kostetskıy em körüşöv quvançını, em ayırılıq faciasını köstermek içün kerekli şekilni qıdırdı. Sanat tarihi, hususan Rembrandtnıň resimleri aqqında bilgiler yardım etti. Rembrandtnıň icadını ressam cenkten evel Ermitajda ögrnedi. Kerekli alnı Rembrandtnıň “Ana-babasını ürmek etmeyip, evden ketken ve ahırı qayıp kelgen bala” eseri köstermege yardım etti. Baş qaramannıň yüzünü körmeymiz ve buña köre de tasavurımız er angi tanış bir yüzni oña qoşa bile. Böyleliknen, Ekinci cian cenkiniň kerçek bir askeri, evde cenkten beklenilgen bir insanıñ umumiy obrazına çevirile. Müellif qadınıñ da yüzünü köstermey, tek sevimli aqayını özüne sarıp alğan qollarına diqqat ete. Yarıq

tek, öz quvançını gizlep olamağan oğlançıqını yüzünü aydınлата. Uzaqтан yımşaq yarıqnen qart qadın – askerniñ anasınıñ yüzü kösterilgen. Telâşlı vaziyetni yaratqan resimniñ renkligi pek müimdir.

1947 senesi zakarpattâlı ressam Adalbert Erdeli, **Ujgorod ressamlarınıñ toplu portretini** yaptı, bunıñ esası, bir yıl evel eviniñ azbarında çekilgen bir fotoresim edi. Resimde Yosıp Bokşay, Andriy Kotska, Adalbert Boretskiy, Adalbert Erdeli, Ernest Kontratoviç, Şandor Petki tasvir etilgen. Bular, Avropada (Praga, Budapeşt, Buharest) tasil alğan zakarpattâ ressamlıq mektebiniñ temsilcileridir, icatlarınıñ inkişafı 1920-nci ile 1960-ıncı yıllar arasında oldu. Erdeli – soldan birinci, elinde fırçinen ve soldan birinci turğan Bokşaynı zakarpattâ ressamlıq mektebiniñ qurucıları, dep sayalar. Ekisi de Avropadaki kibi Zakarpattâda bir Sanatlar Akademiyasını qurmağa hayal ete edi. 1927 senesi Zakarpattâda sanat tasiliniñ temellerini atqan bir sanat mektebini açmağa becerdiler. Şimdi bu, Adalbert Erdeli adına sanat kollecidir, Yosıp Bokşay adını ise vilâyet sanat müzeyine berdiler.

Yosıp Bokşay icadiy karyerine diniy sanatnen başladı, Ujgoroddaki Uspensk kafedral baş kilsesiniñ divarlarında resim yapa edi. Sovet devrinde eñ az ideologik olaraq üküm sürgen peyzaj türüne muracaat etti. Ukraina milliy sanat müzeyiniñ devamlı sergisinde Bokşaynıñ cenkten soñraki devirniñ **"Kögem gülley"** ve **"Dağdaki gölçik"** serlevalı eki peyzajı taqdim etilmekte. Açıq, çınlağan renkler ve özgün bir noqta-i nazar sayesinde, peyzaj ressamları içün sade motivler yañı bir nefes, yañı hususiy bir ritm ala.

Adalbert Erdeliniñ eserlerinde, Paul Cezanne ve fransız ressamlıgınıñ fovizm aqımınıñ tesiri bardır. Bu ananelerniñ qullanmasını **"Tıñç özen. Şelestovo"** peyzajında köre bilirsiniñiz, ve bu anane ressamğa, Mukaçevo cıvarındaki köyniñ er zamanki manzarasını dekorativ bir şekilde çizilmesine, **"Yaş qadın"** resminde ise etnografik tamlıqtan çekilmek, Matis ruhundaki halq kostüminiñ renklerinden meraqlanmağa yardım ete.

Soldan ikinci – Fedir Manaylo, yalınız ressam degil edi, Zakarpattyaniñ etnografik materiallarını tetqiq ete ve toplay edi. Bu sebepten, rejissör Serğiy Paracanov onı, halq yaşayışınıñ eñ yahşı bilgiri olaraq, "Unutılğan ataların kölgeleri" filminde

karpāt turmuşı mevzusında mesleatçı olmağa davet etti. Manaylo, toy merasiminiñ resmi ile bir kilimni öz başına toqumağa niyet etti ve bunıñ içün karton üzerinde bir taslaq yaptı. Lâkin vaqtinen taslaq mustaqıl bir eser - **"Ğutsul toyu"** resmi olaraq alğışlanmağa başladı. Resimniñ ilk niyetine köre, qalabalıq toy faaliyeti kilim printsipine uyğun bir şekilde ileriley: ressam insanlarnıñ figuralarını, peyzajnı, şarait detallerini acayip örneklerge toplanğan dekorativ elementleri olaraq tertip ete. Aynı zamanda, resim dinamikanen tolu, parlaq renkler halq bayramınıñ optimizmini ifade ete.

Yuqarıda ortada tasvir etilgen ressam Andriy Kotska, Yosıp Bokşaynıñ talebesi edi. Kotska halq obrazlarına sıq-sıq muracaat ete edi. Hususan, portretler seriyasında, Karpatlar regionına has, şahsiy umumiyleştirici qadın güzelliginiñ türünü inkişaf etti. Bunı kerçekleştirmek içün Kotska özüne has - şuuruna barılğan sınırlı, zarif bir renklilik ve biraz bulançıq bir kontr kibi usullarnı qullandı. Sergide körgeniñiz **"Koloçavka qızı"** portreti, bu obrazlar galereyasında eñ yahşılardan biridir.

Ekinci cian cenkinden soñ ve Zakarpattânıñ USSC-ne qoşulmasından soñ regionnı Şarq ve Merkeziy Ukraina ressamları sıq-sıq ziyaret ete edi. Ressamlar çoq körüşip, tecribelerinen paylaşa ediler. Böyleliknen, Ğavrılo Ğlük, Tetâna Yablonskanıñ "Ötmek" resminiñ tesiri altında, içtimaiy kerçekçilik içün özüne has neşeli çalışma mevzusını inkişaf ettirgen **"Oduncılar"** resmini yaptı. Eserde karpāt manzarasınıñ renk zenginliği, içtimaiy kerçekçilikten az duyulmay.

Zakarpattâ mektebi cenkten soñraki ukrain ressamlıqnıñ inkişafında müim bir rol oynadı. Milliy ananelerniñ bilgisi ve eserlerinde uzviy bir şekilde birleşken Ğarp Avropa modernizminiñ canlı, taze nefesi, içtimaiy kerçekçilikniñ sıq çerçevesini genişletti, ukrain sanatına özgün bir hususiyet qazandırdı.

"Şestidesâtnikler" añlamı yalñız tasviriy sanatqa ait degil, ilk nevbette 1950-1960-cı senelerniñ soñunda Sovet totalitar rejimine qarşı çıqqan ressamlar, yazıcılar, şairler - fikirdeşler dairesi ile bağıldır. Şestidesâtnikler "Hruşçov yımşaması" dalğasında, yani Stalinniñ ölümünden soñra rejimniñ liberelleşmesi zaman ve bunıñ neticesinde qısqa milliy ğayrıdan tiklenüv devrinde peyda oldılar.

Kıyiv şestidesâtnikleri areketiniñ eñ timsaliy sıması, körüşleri içün can bergen ressam Alla Ğorska edi. Şimdi ögüñizde körğeniñiz resimni Ğorska facialı ölüminden 10 yıl evel yaptı. O, cesür, harizmatik edi, başqalarını teşkil etmege ve ilhamlandırmağa bile edi, vatandaş mevamını daima izçenliknen bildire edi. Meraqlıdır ki, o, ruslaştırılğan qorantadan edi ve mektepte ukrain tilini ögremegen edi. Amma büyügen soñ tilni ögrenip, daima tuvğan tilinde laf etti.

Alla Ğorska icadında ilk nevbette ukrain avangardı ve halq sanatına esaslına edi. Çünki tam bunda ukrain medeniy hatıranıñ qorunmasını kördi.

“Oğul ile öz portreti” eseri, “sert üslüpniñ” tesiri ve oña has olğan dramatik dünya is etüvi ve pafos yoqluğı ile qayd etilgen. Anasına yapışqan balanıñ figurasında, seyircige baqqan ressamniñ teren baqışında, facialı taqdir gizlene. “Bala ile Meryem ana” ikonalar ile beñzerlik resimniñ dramatikligini quvetleştire ve ressam içün müim olğan ananeler ile bağ qura.

Alla Ğorskanıñ fevqulâde hususiyeti, onıñ qısqa, amma adiseler ile tolu ömrü bir çoq şeyde aqayı Viktor Zaretskiyniñ icadiy taqdirini belgiledi. 1960 seneleri o apayı ile pek çoq abideviy sanat saasında çalıştı. Bu devirde olar mozaika ve pannolar yaratqanı ve halq icadınen oğraşqanı şu zamannıñ ketenlerinde akis etildi.

Zaretskiyniñ **“Baar yeli”** resminde hayallarğa dalğan bir oğlan ve gülçember yapqan qız sanki öz dünyasındalar. Figuralar aselet büyütilgen, qızniñ yalınayaqları az qala resimniñ kenarına çıqa. Bu, müellifniñ sovet ressamları arasında meşur olğan Meksika muralizmi, hususan Diyego Revera ve Hose Sikeyrosniñ divar resimleri ananesi ile tanış olğanını bildire.

Faal areket etken şestidesâtnikler arasında eykelci Boris Dovğan bar edi. O, başqalarinen beraber 1968 senesi Sovet rejiminiñ siyasiy mabüslerini desteklemek içün “139 narazılıq mektübi”ni imzalağan edi. Bu mektüp sebebinden kelecek seneler devamında usta devlet sımarişlarını almadı.

Dostu **Vasıl Stusniñ portretinde** eykelci şair ve siyasiy mabüsniñ azaplı taqdirini aldından kördi. Meşur ukrain yazıcısı, terciman, nesirci, uquq qoruyıcı Vasıl Stus meslegi içün mahküm etilgen edi, Sovet apishanelerinde ve lagerlerinde edi ve 47 yaşında anda öldi.

Şair eykelci için bir qaç seans devamında poza berdi. Vasıl Stusniñ bet çizgileri iri, mümkün qadar umumiyleştirilgen şekilde kösterilgen, portretniñ tökülgen çoyunda esas şey qayd etilgen – sarsılmamazlıq ve boysunmamazlıq. Baqışını körmeymiz, çünkü közleri aşağı baqa. Sıqılğan dudaqları, çatqan qaşları, betiniñ kergin adaleleri iç kergin olğanını ve tüşüncege dalğanını köstere. “İç kimse seni keder içinden qurtarmaz, iç kimse öz yolundan şaşırtmaz”. Stusniñ “Palimpsestı” toplamından olğan bu şiir satırları portretniñ esas çizgisini tasvirley: boysunmamazlıq.

Bu eser Doğanıñ müellifligi altında icadiy ziyalıların portretler galereyasını açtı. Bu tercimanlar, bestekârlar, ressamlar. Olarnıñ ebediyleştirilüvi eykelciniñ yüksek missiyasına çevirildi.

Altmışınçı yıllar yaratıcılıq ve vatandaş faalliginiñ qısqa köterilüvi oldı. Ukraina sanatı tarihinde bu adiseniñ emiyeti pek qıymetlidir. 1970-ci seneleriniñ başında milliy ğayrıdan tiklenüvniñ bir çoq iştirakçisi için taqiqlernen bitti

Tetâna Yablonska 20-nci asır ikinci yarısınıñ ukrain sanatınıñ müim isimlerinden biridir. 1917 senesi Smolenskde, gimnaziya ocaları ailesinde doğdı. Ana-baba mahsus balalarını sovet mektebine bermediler, olarnı evde oquttılar. Ailede er vaqıt icadiy bir atmosfera üküm süre edi, balalar çoq oquy edi, tarih ve sanatnen meraqlana ediler. 1928 senesi Yablonskiyler Ukrainağa köçtiler.

Ressamniñ babası özü ihtisaslı bir ressam olmağa istedi, amma hayalını tek balaları kerçekleştirip oldı. Ortancı qızı Tetâna ve kiçikleri Dmıtronen Olena Kiyiv sanat institutına kirdiler.

Oquşniñ ilk yıllarından başlap Tetâna Yablonska özünü istidatlı bir ressam olaraq kösterdi. Aliy oquv yurtınıñ tarihinde, şahsiy sergini keçirmege imkân berilgen ilk studenti edi. Tetâna Yablonska, Fedir Krıçevskıyniñ ustahanesinde oquy edi, bu sebepten ressamniñ ilk eserlerinde onıñ tesirini körmek mümkün.

Yablonskanıñ figurası, ukrain sanatı için o qadar müim ki, üslup qıdırmalarının ve tüşünceleriniñ aman-aman er yañı etapı, 1940-1980-inci yıllarnıñ ukrain sanatında yañı bir devir manasına kele. Cenkten soñraki devirde Yablonska bir sıra

içtimaiy kerçekçilik resim yapa, bularnıñ arasında eñ yüksek devlet mukâfatını alğan ve Moskvadaki Tretyakov galereyasınıñ kolleksiyaasına satıp alınğan efsaneviy "Ötmek" (1949) resmi ayrı bir yerni ala. Zakarpattâ ve Ermenistanğa yapılğan seyaattan soñ, ressam halq sanatınen meraqlandı. 1960-ıncı yıllarnıñ eserleri tüzlemlik ve dekorativlik olaraq qayd etile. 1970-inci seneleri Yablonskanıñ Florentsiyağa yapqan seyaattan ve italyan Renessansı sanatını diqqatlıca ögrenen soñ, eserlerinde belli bir abideviylik ve mecazğa meyil peyda ola. Ressamnıñ icadınıñ keç deviri, qıntav, qalabalıq ve sevimli impresionistlerniñ ananelerine muracaatınen belgilene.

Tetâna Yablonska küçlü bir zat edi: er vaqıt yañı bilgilerge açıq edi, Sanat institutında pedagogik işine tamamen özünü bere edi, çoq ve tüşünceli bir şekilde resim yapa edi, qızlarını terbiyeley edi. Qıyın siyasiy şartlarda çalışa edi, amma icadınıñ tili bugün de aktual olacaq qadar inandırıcı ve añlaşılğan.

Müzey kolleksiyasında "Ayat devam ete" resmi, Yablonskanıñ eñ merqlı eserlerinden biridir. Başta "Em hatıralar, em hayallar" olaraq adlandırılğan edi. Bu eserniñ yaratılma ikâyesi, belli bir derecede sovet ressamınıñ çalışmasınıñ içtimaiy-siyasiy şartlar qıynlığını köstere ve Yablonskanıñ resmiy sanat ve serbest icadınıñ sınırında yaşayışınıñ mecazı ola.

Resim 1960-ıncı yıllarınıñ ortasında - büyük devlet sergisi içün ve Taras Şevçenko ile bağı yerlerniñ resimlerine köre yapılğandır.

Yablonska: "Ayat devam ete" resmi, bu devirdeki resimlerim kibi dekorativ tarzında yapılmağan olsa da, mündericesi ve kompozitsiya fikrinen, sanki halq yaşayışı aqqındaki tüşünceler devrini yekünley", - dep yazdı. Milliy urba içinde tipik bir ukrain eviniñ ögünde tapçanda oturğan, hatıralarına dalğan ihtiyar bir qartbabanı ve qasevet ve ümütlernen tolu, qollarında balasınen birlikte yaş bir qızını tasvir etken ressam nesillerniñ deñişmesini kösterdi, doğum ve ölüm ğayesini kerçekleştirdi.

Daa serginiñ başlanğından evel, resim ideologik sebeplerden, "sovet kerçekçiligini masqara ete" - taqrizi ile aldırıldı. Yablonskanı partiya başlığına ifade içün çağırğan ediler. "Bu qadar eski evlerni qayda kördiñiz, qadınlarımıznıñ böyle kiyingenlerini qayda kördiñiz? Episi on sınıfını bitirdi,

episi krepdeşn içinde. Ne için öz ara laf etmeyler, nesillerniñ birliğı qayda? Ne için farklı taraflarğa baqalar? – Merkez Komiteti kâtibi, Andriy Skab ideologiyasına açuvlana edi.

Ressam bu resimniñ başqa variantını yapmağa mecbur qaldı – "Baar küneşinde", böylece partiya tabaqasını tamamınen memnün etti. Ressam: *"Anda em kelin "zemaneyiy" anter içinde, em qartbaba "balaçıqnen erişe". Ve eski milliy urba içinde degil, üstünde eski askeriy qap ve ev yañı ve ilâhre. Evelki resimde köstermege istegenim teren manadan marum, tamamınen farklı, tamamınen türlü resim yaptım. Ve bunıñ için pek utanam, başlıqniñ elçirpmalarına lâyıq olsa da"*, – dep hatırlay edi.

Resimniñ birinci variantı uzun vaqıt devamında ressamnıñ ustahanesinde saqlandı. Bir sefer, Moskvadan planlı bir teşkerme vaqtında, komissiya Yablonskanıñ ustahanesini de ziyaret etmege qarar berdi. Ressam moskvalı ressamlar ve vazifedarlarğa eski "Ayat devam ete" resmini taqdim etti. Olar, eserniñ teren ve felsefiy manasına ayran qaldılar. Personajlarını daa da uzaqlaştıрмаq, olarnı özünde terenleştirmek kerek olğanını ayttılar. Bu ikâyeden soñ, ressam "Ayat devam ete" eserini tamamladı ve daa soñra eñ yahşı eserlerinden biri dep saya edi.

"Baba, demir başlığı sıqa" 1980-cı senelerniñ soñu ve 1990-cı senelerniñ başınıñ emiyetli bir eseridir. O, sanatta yüz bergen temelli deñişmeler, yañı şekiller ve kontseptsiyalar qıdırmaq için Sovet rejim ananesinden ayırıluv aqqında bildire. O devirde artıq yañı kerçeklikni is etken ressamlar ondan taşlap ketilgen hane ya da evlerge qaçıp, olarnı ustahanelerine çevire ediler. Böyle taşlap ketilgen hane ya da evler alâ daa bar. Amma anda şimdi başqa qanun ve qaideler üküm süre. Zengin olmağan hayalcılar keçmişniñ ve keleşekniñ olmağan, yalñız bu an olğan öz alternativ kerçekligini quralar.

Eñ meşur taşlap ketilgen hane ve evlerden biri Paris kommunası soqağındadır, bugünde bu Kiyivdeki Mihayliv soqağı. Anda Oleksandr Gnıltskiy, Oleğ Ğolosiy, Valeriya Trubina, Yuriy Solomko ve digerleri yaşadı. İcadiy deñevler, devamlı cıyınlar, öz-özünden keçirilgen sergiler ve sanat aqqında pek uzun laflar olarnıñ yaşayışınıñ ayırılmaz parçası ola.

“Baba, demir başlığı sıqa” resmini Oleksandr Ğnılıtskiy “Paris kommunası” taşlap ketilgen yerde yaptı. Anda ressamnıñ lağabı “Baba” edi. Bir qızı olğan yekâne edi – bugünde meşur ressam Kseniya Ğnılıtska.

Oleksandr Ğnılıtskiy sıq-sıq öz portretini yapma janrını qullanıp, ömrü devamında onı inkişaf etti. Bu resimni öz portreti kibi saymaq mümkün. Balüstrada üzerindeki kemerde seyircilerge arqasınen baqqan oturğıçtaki erkek tasvir etilgen. Balüstrada arqasında dağların sızıqlarını ve bayraqları olğan adam sürüsini köremiz. Resimniñ sol köşesinde rus tilinde “Baba, demir başlığı sıqa” yazılğan.

Bu eserniñ adınıñ ve körülme komponentiniñ bir çoq yoravı ola bile. Hususan “Parkomunna” ressamlarınıñ mana oyunlarına sevgisini köz öğüne alsaq. Resimni tercimeial ceetinden baqsaq, ressamnıñ özüne alğan baba rolüniñ kopyası kibi körüne. Bundan ğayrı, sadeleştirilgen sanat yazı tarzınıñ qayd etilmesi, akademiya mektebi istizalı tenqit etilgeni aqqında fikirler doğura.

"Resim"! – pek sade – ve provokativ olaraq, Tiberiy Silvaşı 98-inci yılındaki resmini adlandırdı. "Men de böyle yapa bilirim" aytmak istegen er keske cevap kibi. Ya da – "BU sanatmı?". "Özü de yapa bilecek" er keske – ukrain abstrakt sanatınıñ patriarhı böyle cevap bere: "Yapıñız! Amma o vaqıt bunı bir ömür devamında yapıñız. Ayatıñıznı böyle obyektlerniñ yaratılmasına yatırıñız! Yalıñız bu, sizge sanat yapqanıñıznı tasdıqlama aqqını berir".

Resimleri Münih, Viyana, Nyü Jersi, Zaporijjâ, Harkiv, Ujğorod, Kıyiv müzeylerinde, ayrıca da Avropa ve ABD-niñ şahsiy kolleksiyalarında saqlana. Silvaşı özü – bir kaç yıldır yalıñız eñ populâr ukrain ressamlarından biri degil. Amma aynı zamanda umumen yerli sanatnıñ eñ müim şahıslarından biridir. Öz felsefesini kütkeni içün – em daa 80-inci senelerniñ sovet, em 90-ıncı senelerniñ inqilâbiy, em de 2000-inci senelerniñ siyasiyleştirilgen ressamları arasında itibar qazanğan edi. Eserlerindeki renk aman-aman siirli bir şekilde çalışma. Diqqatlıca baqıñız: seyircini sanki resimniñ içine çeke! Silvaşı renk ve yarıq ile çalışma. Ve resminiñ tüzlemi farqlı faktura boyasınen qaplanğan – "Resim"de kibi, meselâ, – yañı kerçeklikni yarata.

Ne için ciddi akademik bilgisine saip bir ressam, oldukça gerçekçi resimlerden - şimdi meşur figurativ olmayan monohromlara geçti?

Bu değişimin sebebi ola bilecek aylanma noktalarından biri, belki de 1964 senesi, Serhiy Paracanovniñ "Unutılğan ataların kölgeleri" filmniñ çekilmesi vaqtında gerçekleşti. Tiberiy Silvaşi - o vaqıtlar Cumhuriyet bediîy mektebiniñ talebesi - dağdan etüd defterinen engende, çekiş gruppasını beklegen rejissör Sergiy Paracanov ve ressam-sanalaştırıcı Georgiy Yakutoviçqa rastkeldi. Olarğa yaqınlaşqanda, Tiberiy, Paracanovniñ yüzünde istizalı külümsirevni kördi. Rejissör: "Kene varaqa sızdını?", - dep soradı.

Yanından keçkende kibi ayılğan ibare yaş ressamğa pek tesir etti. O körüşüv - oña "sanat nedir?" sualine cevap qıdırmağa mecbur etti. Ve gerçekçilikniñ doğru akis etilmesi - onıñ yekâne vazifesimi? Bundan şübelenmek - oldukça sovet bediîy institutında oquğanda, içtimaiy gerçekçilikniñ tek doğru usul olğanı sayılğanda - has olmağan ve ğayet havflı edi. Lâkin değişimin kerek olğanı duyğusu - o vaqıt bir çoq progressiv ressamda arta edi.

Yaş ressamların yañı generatsiyası devlet tarafından yapılğan ideologik basqılardan yavaş-yavaş qurtula edi. Ve endi 80-inci seneleri, Ğayrıdan qurma ve yañılıqqa açıqlıq dalğasında, Tiberiy Silvaşi ressamların "Birlik" yaş sektsiyasına baş oldı. Bediîy qabiliyetinden ğayrı, yahşı bir teşkilâtçı olmaq qabiliyeti de ortağa çıqtı. Ve o vaqıt - temiz renknen deñeme yapqanda - eki yaşlar plenerni başlattı. Tamam anda - mustaqil Ukrainanıñ birden ziyade ressamlar birleşmesi yetiştı. Aralarında "Güzel manzaralı qoruq" da bar edi.

Silvaşiniñ eseri yanında Mikola Krıvenko, Oleksandr Jivotkov, Anatoliy Krıvolap eserleriniñ taqdim etilmesi tesadüfen degil. Episi "Güzel manzaralı qoruq" Kıyiv ressamların birliğine kirdi.

Bu birlikniñ iştirakçileri, renk ve boyanıñ, büyük bir renk-plastik diapazonnen birlikte universal bir malzeme olaraq imkânlarını tetqiq ete ediler. Serbest, üküm sürülmegen icatniñ bir tür "qoruq zonası"nı yaratıp, endi ölgen "içtimaiy gerçekçilik"niñ aksine - yaş ressamlar Ukrainağa sanatniñ yañı, multimedia devrini yaqınlaştıra ediler.

"Güzel manzaralı qoruq"nın ǵayeleri ve icadiy alıřmaları – 1990-ıncı seneleri ukrain sanatının eñ müim adiselerden biridir. Gruppanın bar olması umumen ukrain ressamlıq inkiřafının emiyetli bir etapı oldı.